



柳田文庫
文庫11
D 303
62



文庫 11
D 303
62

柳田泉文庫

48-11024

010190567902

馬氏
經閣
圖書

三國氏
圖書

圖書

史卷二百六十六 大早食對列傳第一百五十四

總裁總理事務 經講官保兼李太保保和殿大學士兼管吏部部理事務 架敘張廷玉等奉

救修

馬世奇

周鳳翔

汪偉

王章

陳純德

成德

金鉉

吳麟徵

劉理順

吳甘來

陳良謨

申佳允

許直

明史卷二百六十六

列傳

馬世奇字君常無錫人祖濂進士桂林知府世奇幼穎異嗜學有文名登崇禎四年進士改庶吉士授編修十一年帝遣詞臣分諭諸藩世奇使山東湖廣江西諸王府所至却饋遺還進左諭德父憂歸久之還朝進左庶子帝數召廷臣問禦寇策世奇言闖獻二賊除獻易除闖難人心畏獻而附闖非附闖也苦兵也今欲收人心惟敕督撫鎮將嚴束伍部使兵不虐民民不苦兵則亂可弭帝善其言爲下詔申飭時寇警日亟每召對諸大臣無能畫一策世奇歸邸輒太息泣下曰事不可爲矣十七年三月城陷世奇方早食投筯起問帝安在東宮

二王安在或言帝已出城或言崩或又言東宮二王被執世奇曰嗟乎吾不死安之其僕曰如太夫人何世奇曰正恐辱太夫人耳將自經二妾朱李盛飾前世奇誅曰若以我死將辭我去耶對曰聞主人盡節我二人來從死耳世奇曰有是哉二妾竝自經世奇端坐引帛自力縊乃死先是兵部主事成德將死貽書世奇以慷慨從容二義質焉世奇曰勉哉元升吾人見危授命吾不爲其難誰爲其難者與君攜手黃泉預訂斯盟無忘息壤矣世奇修頤廣頰揚眉大耳砥各行居館閣有聲好推獎後進爲人廉父死蘇州推官倪長盱以贖緩二三

助喪世奇辭曰蘇饑留此可用振座主周延儒再相世
奇同郡遠嫌除服不赴都及還朝廷儒已賜死親暱者
率避去世奇經紀其喪其好義如此贈禮部右侍郎諡
文忠

本朝賜諡文肅

吳麟徵字聖生海鹽人天啓二年進士除建昌府推官
禽豪猾捕劇盜治聲日聞父憂歸補興化府廉公有威
僚屬莫敢以私進崇禎五年擢吏科給事中請罷內遣
言古用內臣以致亂今用內臣以求治君之於臣猶父
之於子未有信僕從舍其子求家之理者又言愛民之

奉在守令郡守廉縣令不敢貪郡守慈縣令不敢虐郡
守精明縣令不敢叢脞宣倣宣宗用况鍾故事精擇而
禮遣之重以璽書假便宜久任民生疾苦吏治臧否使
得自達天子時不能行麟徵在諫垣直聲甚著尋上疏
乞假葬父既去貽言路公揭謂自言官積輕廟堂之上
往往反其言而用之奸人窺見此旨明告君父目爲朋
黨自稱孤立下背公論上竊主權諸君子宜盡化沾沾
之意毋落其彀中使清流之禍再見明時居久之還朝
劾吏部尚書田唯嘉贓污唯嘉罷去再遷刑科給事中
丁繼母憂服闋起吏科都給事中時貨賂公行銓曹資

格盡廢麟徵上言限年平配固銓政之弊然舍此無
待中才今遷轉如流不循資格巧者速化拙者積薪
奔競之門無益軍國之計帝深然之十七年春推太常
少卿未幾賊薄京師麟徵奉命守西直門門當賊衝賊
詐爲勤王兵求入中官欲納之麟徵不可以土石堅塞
其門募死士縋城襲擊之多所斬獲賊攻益急麟徵趨
入朝欲見帝白事至午門魏藻德引麟徵手曰國家如
天之福必無他虞旦夕兵餉集公何息遽爲引之出遂
還西直門明日城陷欲還邸已爲賊所據乃入道旁祠
作書訣家人曰祖宗二百七十餘年宗社一日至此雖

上有亢龍之悔下有魚爛之殃而身居諫垣無所匡救
法當褫服殛用角巾青衫覆以單衾以志吾哀解帶自
經家人救之甦環泣請曰待祝孝廉至一訣可乎許之
祝孝廉名淵嘗救劉宗周下獄與麟徵善者也明日淵
至麟徵慷慨曰憶登第時夢隱士劉宗周吟文信國零
丁洋詩今山河碎矣不死何爲酌酒與淵別遂自經淵
爲視舍殮而去贈兵部右侍郎諡忠節

本朝賜諡貞肅方賊之陷山西也薊遼總督王永吉請
撤寧遠吳三桂兵守關門選士卒西行遏寇卽京師警
旦夕可援天子下其議麟徵深然之輔臣陳演魏藻德

不可謂無故棄地二百里臣不敢任其咎引漢棄涼州
爲證麟徵復爲議數百言六科不署名獨疏昌言弗省
及烽烟徹大內帝始悔不用麟徵言旨下永吉永吉馳
出關徙寧遠五十萬衆日行數十里十六日入關二十
日抵豐潤而京師已陷矣城破八門齊啓惟西直門堅
塞不能通至五月七日集民夫發掘乃開

周鳳翔字儀伯浙江山陰人崇禎元年進士改庶吉士
授編修遷南京國子司業靈璧侯奴辱諸生鳳翔執付
法司歷中允諭德爲東宮講官嘗召對平臺陳滅寇策
言論慷慨帝爲悚聽軍需急議稅間架錢鳳翔曰事至

此急宜收人心尚可括民財搖國勢耶亡何京師陷莊
烈帝殉社稷有譎傳駕南幸者鳳翔不知帝所在趨入
朝見魏藻德陳演侯恂宋企郊等羣入而賊李自成據
御坐受朝賀鳳翔至殿前大哭急從左掖門趨出賊亦
不問歸至邸作書辭二親題詩壁間自經詩曰碧血九
原依聖主白頭二老哭忠魂天下悲之去帝崩纔兩日
也後贈禮部右侍郎諡文節
本朝賜諡文忠

劉理順字復禮杞縣人萬曆中舉於鄉十赴會試至崇
禎七年始中式及廷對帝親擢第一還宮喜曰朕今日

得一者碩矣拜修撰益勤學非其人不與交十二年春
畿輔告警疏陳作士氣矜窮民簡良吏定師期信賞罰
招脅從六事歷南京司業左中允右諭德入侍經筵兼
東宮講官楊嗣昌奪情入閣理順昌言於朝嗣昌奪其
講官開封垂陷理順建議河北設重臣練敢死士爲後
圖疏格不行嗣昌薛國觀周延儒迭用事理順一無所
附麗出溫體仁門言論不少徇賊犯京師急守卒缺餉
陰雨饑凍理順詣朝房語諸執政急請帑衆唯唯理順
太息歸捐家貲犒守城卒僚友問進止正色曰存亡視
國尚須商酌耶城破妻萬妾李請先死旣絕理順大書

曰成仁取義孔孟所傳文信踐之吾何不然書畢投繯
年六十三僕四人皆從死羣盜多中州人入信曰此吾
鄉祀縣劉狀元也居鄉厚德何遽死羅拜號泣而去後
贈詹事諡文正其而無人宜封諡諡而後死
本朝賜諡文烈金刻之門以國史南京其時重法而
汪偉字叔度休寧人寄籍上元崇禎元年進士十一年
由慈谿知縣行取帝以國家多故朝臣詞苑起家儒緩
不習吏事無以理紛禦變改舊例擇知推治行卓絕者
入翰林偉擢檢討給假歸還朝充東宮講官十六年賊
陷承天荆襄偉以留都根本之地上江防縞繆疏言金

陵城週圍百二十里雖十萬衆不能守議者謂無守賊法有防江法賊自北來淮安爲要自上游來九江爲要禦淮所以禦江守九江所以守金陵也淮有史可法屹然保障九江一郡宜設重臣鎮之自是而上之至於武昌下之至於太平采石浦口命南京兵部大臣建牙分闔以接聲援而金陵之門戶固矣南京兵部有重兵而無用操江欲用兵而無人宜使緩急相應而府尹府丞之官重其權久其任聯百萬士民心以分兵部操江之責帝嘉納之乃設九江總督又言兵額旣虧宜以衛所官舍餘丁補伍操練修治兵船以資防禦額餉不足暫

借鹽課漕米給之所條奏皆切時務明年三月賊兵東犯偉語閣臣事急矣亟遣大僚守畿郡中都中城守文自內閣武自公侯伯以下各率子弟畫地守庶民統以紳士家自爲守而京軍分番巡徼以待勤王之師魏藻德笑曰大僚守畿輔誰肯者偉曰此何等時猶較尊卑計安危耶請以一劇郡見委藻德哂其早計未幾真定遊擊謝加福殺巡撫徐標迎賊偉泣曰事至此乎作書寄友人曰賊據真定奸人滿都城外郡上供絲粟不至諸臣無一可支危亡者如聖主何平時誤國之人終日言門戶而不顧朝廷今當何處伸狂喙耶賊薄都城守兵

明史卷一百一十七 列傳 七
乏餉不得食偉市餅餌以饋已而城陷偉歸寓語繼室
耿善撫幼子耿泣曰我獨不能從公死乎因以幼子屬
其弟衣新衣上下縫引刀自剄不殊後投繯遂絕時年
二十三偉欣然曰是成吾志移其屍於堂貽子觀書勉
以忠孝乃自經贈少詹事諡文烈

本朝賜諡文毅

吳甘來字和受江西新昌人父之才西安府同知甘來
與兄泰來同舉鄉試崇禎改元甘來成進士授中書舍
人後三年泰來亦成進士授南京太常博士五年甘來
擢刑科給事中七年西北大旱秦晉人相食疏請發粟

以振而言山西總兵張應昌等半殺難民以冒功中州
諸郡畏曹變蛟兵甚於賊陛下生之而不能武臣殺之
而不顧臣實痛之又言賞罰者將將大機權也陛下加
意邊陲賞無延格乃紅夷獻俘黔蜀爭功昌黎死守功
猶待勘急則用其死緩則束以文法且封疆之罰武
與文二內與外二士卒與將帥二受命建牙或逮或逐
以封疆罪罪之而跋扈將帥罪狀已暴止於戴罪偏裨
不能令士卒將帥不能令偏裨督撫不能令將帥將聽
賊自來自去誰為陛下剪凶逆者憂歸服闋起吏科進
兵科右給事中乞假歸十五年起歷戶科都給事中中

外多故荆襄數郡賊未至而撫道諸臣率稱護藩以去
甘來曰若爾則是棄地方而逃也城社人民誰與守者
乃上疏曰天子衆建親親將使屏藩帝室故曰宗子維
城乃烽火纔傳一朝委去以爲民望而諸臣猶嘍嘍以
擁衛自功掩其失地之罪是維城爲可留可去之人名
都爲可守可棄之士撫道爲可有可無之官功罪不明
賞罰不著莫此爲甚疏入帝大嘉歎一日帝詰戶部尚
書倪元璐餉額甘來曰臣科與戶曹表裏餉可按籍稽
臣所慮者兵聞賊而逃民見賊而喜恐非無餉之患而
無民之患宜急輕賦稅收人心帝領之甘來遘疾連請

告會帝命編修陳名夏掌戶科甘來喜得代不數日賊
薄都城時泰來官禮部員外郎矣甘來屬兄歸事母而
自誓必死明日城陷有言駕南幸者甘來曰主上明決
必不輕出乃疾走皇城不得入返檢凡上疏草曰當賊
寇縱橫徒持議論無益豪末盡取焚之母釣後世名遂
投繯死贈太常卿諡忠節

本朝賜諡莊介

王章字漢臣武進人崇禎元年進士授諸暨知縣少孤
母訓之嚴及爲令祖帳歸少暮母訶跪子杖曰朝廷以
百里授酒人平章伏地不敢仰視親友爲力解乃已治

諸暨有聲南半歲以才調鄞縣諸暨民與鄞民爭挽章
至相譁治鄞益有聲數注上考十一年行取入都時有
考選翰林之命行取者爭奔競給事中陳啓新論之帝
怒命吏部上訪冊罪廷臣濫徇者尚書姜逢元王業浩
給事中傅元初御史禹好善等六人閒住給事中孫晉
御史李右謙等三人降調給事中劉含輝御史劉興秀
等十一人貶三秩視事吏部尚書田維嘉等乃請先推
部曹凡推三十二人章與焉授工部主事章及仔濬涂
必泓李嗣京欲疏辨憚爲首獲罪李士淳者耄矣四人
不告而首其名士淳知之懼且怒與章等大詬而帝知

維嘉有私詔許與考又以爲首者必良士也擢士淳編
修章等皆御史章上疏請罷內操寬江南道獄明年出
按甘肅持風紀飭邊防西部寇莊浪巡撫急徵兵章曰
貧寇索食耳策馬入其帳衆羅拜乞降乃稍給之食兩
河旱章檄城隍神御史受錢或戕害人神亟御史母虐
民神血食茲土不能請上帝蘇一方當奏天子易爾位
檄焚兩大注邊卒貸武弁金償以賊首武弁以冒功坐
是數召邊費章著令非大舉毋得以零級冒功劾罷巡
撫劉鎬貪惰又所部十道監司劾罷其四母憂歸服闋
還朝巡視京營按籍額軍十一萬有奇喜曰兵至十萬

猶可爲也及閱視半死者餘冒伍億甚矢折乃缺聞礮
聲掩耳馬未馳輒墮而司農缺餉半歲不發章屢疏請
帑不報踰月賊陷真定京師大震襄城伯李國禎發營
卒五萬營城外章與給事中光時亨守阜成門城內外
堞凡十五萬四千有奇三堞一卒三月初登陴閱十日
始一還邸櫛沐易新衣冠家人大駭章不應賊傅城下
章手發二礮賊少却頃之各門礮聲絕時亨攝章走章
厲聲曰事至此猶惜死耶時亨曰死死此與士卒何別入
朝訪上所在不獲則死死未晚也章從之與時亨並馬
行俄賊突至時亨下馬跪章持鞭不顧叱

曰吾視軍御史也誰敢犯賊刺章股墮章罵曰逆賊勦
王兵且至我死爾滅不旋踵矣賊怒攢槊刺殺章而去
抵暮家人覓屍猶一手據地坐張口怒目勃勃如叱賊
狀妻妾在籍聞之一慟而絕贈大理寺卿諡忠烈一官
本朝賜諡節愍次子之杖任闕爲職方主事亦死難
陳良謨字士亮鄞人崇禎四年進士授大理推官初名
天工莊烈帝虔事上帝詔羣臣名天者悉改之乃改良
謨在職六年兩注上考行取陞見擢御史十二年出按
四川期滿當代再留任時流寇大人蜀詔良謨專護蜀
上巡撫邵捷春專辦賊良謨飭守具堅壁清野賊犯成

鄱遣將據要害爲犄角一再戰賊潰奔帝聞賊擾蜀下
詔責良謨已聞其善守禦乃優旨賜銀幣及還朝賊勢
益迫所規畫率不行而京師陷矣良謨嘗夢拜文文山
於堂下文山揖之上公與予先後一揆何下拜爲覺而
異之及是城陷良謨方移疾臥邸中一慟幾絕自是水
漿不入口或勸良謨無死不答謂邑子李天葆曰吾爲
國死義不顧家惟是母老先君莫葬繼享未定須一言
耳因賦詩付天葆未幾聞帝崩煤山大慟曰主上不冕
服臣子敢具冠帶乎吾巾襲安所得明中天葆以巾進
良謨著巾藍便服起入戶妾時氏隨之遂與妾俱自縊

死時氏京師人年十八良謨踰五十無子以禮納之侍
良謨百三日耳良謨既卒其族人以其兄之子久樞爲
之後未幾久樞亦卒良謨竟無後贈太僕卿諡恭愍
本朝賜諡恭潔

陳純德字靜生零陵人爲諸生以學行稱嘗夜泊洞庭
爲盜竄躍出墮水再躍入洲渚比曉坐蘆葦中去泊舟
數十丈崇禎十三年成進士年已六十矣莊烈帝召諸
進士咨以時事純德奏稱旨立擢御史巡按山西七月
部內嚴霜民凍餒純德上疏請恤因陳抽練之弊言兵
抽則人失故居無父母妻子之依田園邱壠之戀思歸

則逃逢敵則潰抽餘者既以餉薄而安於無用抽去者
又以遠調而不樂爲用伍虛而餉仍在不歸主帥則歸
偏裨樂其逃而利其餉凡藉以營求遷秩皆是物也精
神不以束伍而以侵餉厚餉不以養士而以求官伍虛
則無人安望其練餉糜則愈缺安望其充此今日行間
大弊也帝不能用還朝督畿輔學政將出按部都城陷
賊下令百官以某日入見衆攝純德入還邸勸哭遂自
經京山人秦嘉承買地葬之永定門外立石表墓焉贈
太僕卿謚恭節

中佳允字孔嘉永年人崇禎四年進士授儀封知縣縣

故多盜佳允嚴保甲法盜無所容霽雨河決賊舟怒濤
中塞其口捕大猾置之法以才調杞縣八年賊掃地王
率萬人來攻城土垣多圯佳允募死士擊走賊因鑿其
城唐王聿鍵勤王將抵開封諸大吏惴恐集議曰留之
不聽行守土者且得罪佳允曰惟周王可留之衆稱善
用其計治行卓異擢吏部文選主事上備邊五策進考
功員外郎佐京察大學士薛國觀傾少詹事文安之安
之佳允座主也事連佳允左遷南京國子博士久之遷
大理評事進太僕丞閱馬近畿聞李自成破居庸歎曰
京師不守矣君父有難焉逃死馳入都遍謁大臣爲畫

戰守策皆不省貽子涵光書曰行已曰義順數曰命義不可背也命不可違也天下事莫不壞於貪生而畏死死於疾死於利死於刑戮於房幃於鬪戰均死也死數者不死君父蓋亦不善用死矣今日之事君父之事死義也猶命也我則行之京師陷冠帶辭母策馬至王恭廠從者請易服以避賊佳允曰吾起微賤食祿十三年國事至此敢愛死乎兩僕環守不去給之曰吾不死也我將擇善地焉下馬旁見灌畦巨井急躍入僕號呼欲出之佳允亦呼曰告太安人有子作忠臣勿過傷也遂死年四十二贈太僕少卿諡節愍

本朝賜諡端愍

成德字元升霍州人依舅氏占籍懷柔崇禎四年進士除滋陽知縣性剛介清操絕俗疾惡若讐文震孟入都德郊迎執弟子禮語刺溫體仁體仁聞而恨之竟州知府增餉額德固爭又嘗捕治其牙爪吏知府怒讒於御史禹好善好善體仁客也誣德貪虐逮入京滋陽民詣闕訟寃震孟在閣亦爲之稱枉德道中具疏極論體仁罪而震孟已被體仁擠而去之好善再劾德言其疏出震孟手帝不之究德母張伺體仁長安街繞輿大罵拾瓦礫擲之體仁恚疏聞於朝詔五城御史驅逐移德鎮

無獄掠治杖六十年門外戍邊坐賊六千有奇而給體
仁校尉五十人護出入德居戍所七年用御史詹兆恒
薦起如臯知縣尋擢武庫主事以母老辭不允乃就道
至則上言年來中外多故居官者爵祿逃心廉恥道喪
陛下御極十七年何仗節死義之寥寥也宋臣張栻有
言仗節死義之臣當於犯顏諫諍中求之夫犯顏諫諍
何難在朝廷養之而已表厥宅里所以伸忠臣孝子於
生前殊厥井疆所以誅亂臣賊子於未死苟死敵者無
功則媚敵者且無罪死賊者褒揚不亟則從賊者恬而
不知畏也未幾城破不知帝所在旁皇廳事已趨至午

見兵部尚書張縉彥自賊所出德以頭觸縉彥胸且
言之俄聞帝崩痛哭持雞酒奔東華門奠梓宮於茶棚
之下觸地流血賊露刃脅之不爲動奠畢歸家有妹年
二十餘未嫁德顧之曰我死汝何依妹曰兄死妹請前
德稱善哭而視其終人別其母哭盡哀出而自縊母見
子女皆死亦投縊死先是懷柔城破德父文桂遇害家
屬盡沒妻劉在京以徵德賊急憂悸死至是又闔門死
難惟幼子先寄友人家獲存贈德光祿卿諡忠毅
本朝賜諡介愍

許直字若魯如臯人崇禎七年成進士出文震孟之門

以名節自砥除義烏知縣母憂歸哀毀骨立終喪蔬食
寢柩旁補廣東惠來縣用清望徵授吏部文選主事進
考功員外郎賊薄都城約同官出貲贖士爲死守計城
陷賊令百官報名直曰身可殺志不可奪有傳帝南狩
者直將往從見賊騎塞道出門輒返曰四方兵戈駕焉
往國亂不匡君危無濟我何生爲已知帝崩一慟幾絕
客以七十老父爲解直曰不死辱及所生賦絕命詩六
章闔戶自經越旦視之神氣如生贈太僕卿諡忠節
本朝賜諡忠愍直有族子德溥者在南閩莊烈帝崩大
哭數日揚州陷又哭數日每獨坐輒慟哭食必以崇禎

錢一枚置几上祭而後食食已復哭又刺其兩臂曰生
爲明臣死爲明鬼事發死西市人傳其人爲
金鉉字伯玉武進人古籍順天之大興祖汝升南京戶
部郎中父顯名汀州知府鉉少有大志以聖賢自期許
年十八舉鄉試第一明年崇禎改元成進士不習爲吏
改揚州府教授日訓諸生聞濂洛正學燕居言動俱有
規格諸生嚴憚之歷國子博士工部主事帝方銳意綜
核疑廷臣朋黨營私度支告匱四方亟用兵餉不敷遣
中官張彝憲總理戶工二部建專署檄諸曹謁見禮視
堂官鉉恥之再疏爭不納乃約兩部諸僚私謁者衆唾

其面彘憲愠甚鉉當權稅杭州辭疾請假彘憲撫火器
不中程劾鉉落職鉉杜門謝客躬爨以養父母十七年
春始起兵部主事巡視皇城聞大同陷疏曰宣大京師
北門大同陷則宣府危宣府危大事去矣請急撤回監
宣中官杜勛專任巡撫朱之馮勛一心僨事之馮忠懇
可屬大事不報未幾勛以宣府下賊賊殺之馮烽火偏
京師鉉奔告母母可且逃匿兒受國恩義當死鉉母章
時年八十餘矣呵曰爾受國恩我不受國恩乎廡下井
是我死所也鉉哭而去城破趨入朝宮人紛紛出知帝
已崩解牙牌拜授家人卽投金水河家人爭前挽之鉉

怒口噴其臂得脫遂躍入水水淺濡首泥中乃繼母聞
卽投井妾王隨之皆死賊踞太內踰月始去金水河冠
袍泛泛見水上內官羣指之曰此金兵部也弟錄辨其
屍驗網中環得鉉首歸合以木身如禮而殮事竣錄自
經後贈鉉太僕少卿諡忠節

本朝賜諡忠潔 晉文獻文獻山西 晉文獻文獻山西 晉文獻文獻山西
右范景文至鉉二十有一人皆自引決其他率委蛇見
賊賊以大僚多誤國繫囚繫之庶官則或用或否用者
下吏政府銓除不用者諸僞將擄掠取其貲大氏降者
十七刑者十三福王時以六等罪治諸從逆者而文武

臣殉難並予贈廕祭葬且建旌忠祠於都城焉曰正祀
文臣祀景文以下二十人及大同巡撫衛景瑗宣府巡
撫朱之馮布衣湯文瓊諸生許琰四人曰正祀武臣祀
新樂侯劉文炳惠安伯張處臻襄城伯李國楨駙馬都
尉鞏永固左都督劉文耀山西總兵官周遇吉遼東總
兵官吳襄七人曰正祀內臣祀太監王承恩一人曰正
祀婦人祀烈婦成德母張氏金鉉母章氏汪偉妻耿氏
劉理順妻萬氏妾李氏馬世奇妾朱氏李氏陳良謨妾
時氏吳襄妻祖氏九人曰附祀文臣祀進士孟章明及
郎中徐有聲給事中顧欽彭培御史俞志虞總督徐標

副使朱廷煥七人曰附祀武臣祀成國公朱純臣鎮遠
侯顧肇迹定遠侯鄧文明武定侯郭培民陽武侯薛濂
永康侯徐錫登西寧侯宋裕德懷寧侯孫維藩彰武伯
楊崇猷宣城伯衛時春清平伯吳遵周新建伯王先通
安鄉伯張光燦右都督方履泰錦衣衛千戶李國祿十
五人曰附祀內臣祀太監李鳳翔王之心高時明褚憲
章方正化張國元六人有司春秋致祭然顧欽彭培俞
志虞輩特爲賊拷死諸侯伯亦大半以兵死而郎中周
之茂員外郎甯承烈中書宋天顯署丞于騰雲兵馬指
揮姚成知州馬象乾皆以不屈死顧未邀贈恤也徐有

聲字聞復金壇人登鄉薦崇禎十三年特擢戶部主事
歷員外郎郎中督餉大同城陷被執不屈死福王時贈
太僕少卿徐標字準明濟寧人天啓五年進士崇禎時
歷官淮徐道參議十六年二月超擢右僉都御史巡撫
保定陞見請重邊防擇守令用車戰禦敵招流民墾荒
帝深嘉之李自成陷山西警日逼加標兵部侍郎總督
畿南山東河北軍務仍兼巡撫移駐真定以遏賊無何
賊遣使諭降標毀檄戮其使賊別將掠畿輔真定知府
邱茂華移妻孥出城標執茂華下之獄中軍謝加福伺
標登城畫守禦策鼓衆殺之出茂華於獄數日而賊至

以城降福王時贈標兵部尚書朱廷煥單縣人崇禎七
年進士除工部主事歷知廬州大名二府卽以兵備副
使分巡大名十七年賊逼畿輔廷煥嚴守備賊傳檄入
城怒而碎之三月四日賊來攻軍民皆走城遂陷被執
不屈死福王時贈右副都御史周之茂字松如黃麻人
崇禎七年進士歷官工部郎中服闋需次都下賊擾得
之迫使跪不屈折其臂而死甯承烈字養純大興人舉
於鄉歷魏縣教諭戶部司務進本部員外郎筦太倉銀
庫城陷自經於官廨宋天顯松江華亭人由國子生官
內閣中書舍人爲賊所獲自經于騰雲順天人爲光祿

著丞賊至語其妻曰我朝臣汝亦命婦可污賊耶夫婦
竝服命服從容投繯死姚成字孝威餘姚人由禮部儒
士爲北城兵馬司副指揮城陷自縊死馬象乾京師人
舉於鄉官濮州知州方里居賊入率妻及子女五人竝
自縊至若御史馮垣登兵部員外郎鄒逢蘭行人謝于
宣皆拷死郎中李逢申拷掠久之逼令縊死與銖瑄志
虞皆獲贈太僕少卿而垣登于宣至諡忠節行取知縣
鄒逢吉拷死贈太僕寺丞時南北阻絕皆未能核實也
湯文瓊許琰事載忠義傳

贊曰傳云君子居其位則思死其官夫忠貞之士臨危
授命豈矯厲一時邀名身後哉分誼所在確然有以自
持而不亂也馬世奇等皆負貞亮之操勵志植節不欺
其素故能從容蹈義如出一轍可謂得其所安者矣

明史卷二百六十七

列傳第一百五十五

總裁官編纂務 經編纂景保李太保保殿臺王兼管部尚書事加級襲延壽本

敕修

馬從聘 耿蔭模

張伯鯨

宋汝玫

族叔 顯除 趙士驥等

范淑泰

高名衡

王 漢

徐沂

楊廷樞

鹿善繼

薛一鶚

馬從聘字起莘靈壽人萬曆十七年進士授青州推官擢御史勦衛李宗城冊封平秀吉逃歸從聘言其父言恭不當復督戎政不從出理兩淮鹽課言近日泰山崩

離圻者里餘由開礦斷地脉所致當速罷不報奸人曰
應豐請掣賣沒官餘鹽助大工帝遣中官魯保督之從
聘極陳欺罔狀不從還朝改按浙江又按蘇松請免增
蘇松常鎮稅課亦不報以久次擢太僕少卿拜右僉都
御史巡撫綏失事奪俸既而有擣巢功未敘引疾歸
加兵部右侍郎家居凡二十餘年終熹宗世不出崇禎
十一年冬

大清破靈壽從聘年八十有二矣謂其三子曰吾得死
所矣又曰吾大臣義不可生汝曹生無害也三子不從
從聘縊三子皆縊贈兵部尚書諡介敏官其一子耿蔭

樓從聘同邑人也字旋極天啓中任臨淄知縣久旱四
服暴烈日中哭於壇雨立澍攝壽光禱雨如臨濟崇禎
中入爲兵部主事調吏部歷員外郎乞假歸城破借子
參竝死之贈光祿少卿

張伯鯨字繩海江都人萬曆四十四年進士歷知會稽
歸安鄞三縣天啓中大計調補盧氏崇禎二年稍遷戶
部主事出督延寧二鎮軍儲自黃甫川西抵寧夏千二
百里不產五穀芻粟資內地賀蘭山沿黃河漢唐二渠
東抵花馬池素沃野亦荒蕪甚伯鯨疏陳其狀爲通商
惠工轉菽麥又倣邊商中鹽意立官市法以招之軍民

稱便大盜起延綏擢伯鯨兵備僉事轄榆林中路擊破
賀恩賢斬一座城金翅鵬敗套寇於長樂堡巡撫陳奇
瑜上其功詔進三階爲右參政仍視兵備事七年春奇
瑜遷總督遂擢伯鯨右僉都御史代之督總兵王承恩
等分道擊破插漢部長及套寇於雙山魚河二堡斬首
三百明年以拾遺論罷尋論延綏功詔起用廕子錦衣
千戶十年秋楊嗣昌議大舉討賊遣戶部一侍郎駐池
州專理兵食帝命傅淑訓明年淑訓憂去卽家起伯鯨
代之如淑訓官又明年熊文燦撫事敗嗣昌自出督師
移伯鯨襄陽文燦之被逮也言勦餉不至者六十餘萬

伯鯨坐貶秩十五年召爲兵部左侍郎明年尚書馮元
駿在告伯鯨攝部事召對萬歲山疾作中官扶出遂乞
休又明年京城陷微服遁還福王立於南京伯鯨家居
不出久之揚州被圍與當事分城守城破自經死
朱玫字文玉萊陽人父繼登萬曆三十二年進士歷官
陝西右參議天啓五年大計謫官玫卽以是年偕族叔
應亨同舉進士玫授虞城知縣應亨得清豐崇禎元年
玫兄琮亦舉進士知祥符而玫以才調繁杞縣三人壤
地相接並有治聲應亨遷禮部主事玫亦擢吏科給事
中嘗疏論用人謂陛下求治之心愈急則浮濶喜事之

人皆飾詭而釣奇陛下破格之意愈殷則巧言孔王之徒皆乘機而鬪捷衆疑其言時應亨已改吏部累遷稽勲郎中落職歸攻方除母喪起故官歷刑科都給事中請熱密槩行於天下又言獄囚稽滯瘼死與刑死幾相半宜有矜釋帝採納之遷太常少卿歷大理卿工部右侍郎攻父繼登已久廢至是爲浙江右參政大學士周延儒客盛順者爲浙江巡撫熊奮渭營內召果擢南京戶部侍郎繼登父子信之十五年夏廷推閣臣順爲攻營推甚力會詔令再推攻與焉帝已中流言疑諸臣有私比入對攻冀得帝意侃侃敷奏帝發怒叱退之與吏

部尚書李日宣等竝下獄日宣等遣戍攻除名順乃驚竄閏十一月臨清破應亨與知縣陳顯際謀城守應亨以城北庫薄出千金建甕城浹旬而畢攻及邑人趙士驥亦出費治守具無何

大清兵薄城城上火礮矢石竝發圍乃解明年二月復至城遂破攻應亨顯際士驥竝死之顯際真定人士驥官中書舍人竝起家進士攻應亨有文名沈迅亦萊陽人也崇禎四年舉進士歷知新城蠡二縣與膠州張若騏同年友善十一年行取入都帝以吏部考選行私親策諸臣迅若騏竝得刑部主事兩人大恚恨結楊嗣昌

得改兵部其年冬畿輔被兵迅請於廣平河間定州蠡縣各設兵備一人又請以天下僧人配尼姑編入里甲三丁抽一可得兵數十萬他條奏甚多章下兵部嗣昌盛稱迅言可用乃命爲兵科給事中迅欲自結於帝數言事皆中旨當是時軍興方棘廷臣言兵者卽以爲知兵大者推督撫小者兵備一當事任罪累立至於是上下謫言兵章奏無敢及者迅極言其弊乞敕廷臣五日內陳方畧帝卽從其言迅考選時爲掌河南道御史王萬象所抵因事劾罷萬象勢益張與若騃盡把持山東事會順天府丞戴澳誣劾平遠知縣王凝命嘉興推官

文德翼貪迅上疏頌二人廉能澳下吏削籍迅累遷禮科都給事中陳新甲主款迅面斥其非廷辨良久又言揚嗣昌死有餘戮借久案以邀功陳新甲負罪不遑移邊勞而錄廢非論功議罪法帝是其言迅奉由嗣昌進隨衆詆毀時論訾薄之尋以保舉高斗光爲鳳陽總督不當謫國子博士乞假歸及新甲誅命追論兵科不糾發罪吏部上迅名帝曰迅御前駁議朕猶識之可復故官未赴而京師陷迅家居與弟迓設砮自衛迓短小精悍馬上舞百斤鐵椎兄弟率里中壯士捕勦土寇畧盡大清兵至破砮迓闔門死之若騃劾黃道周以媚嗣昌

歷職方郎中新甲遣赴寧錦督戰覆洪承疇等十餘萬軍獨渡海逃還論死繫獄李自成陷都城出降

范淑泰字通也滋陽人崇禎元年進士授行人五年冬擢工科給事中上疏陳刑獄繁多乞敕刑官疏理帝褒納之流氓犯河南追論先任巡撫樊尚璟罪劾總兵鄧玘淫掠狀時中官張彝憲言天下逋賦至一千七百餘萬請遣科道官督徵帝大怒責撫按回奏淑泰言民貧盜起逋賦難以督追不從給事中莊鼐獻章正宸建言下吏抗疏救之吏部張捷薦逆黨呂純如淑泰極論其謬并論大學士王應熊朋比行私劾捷狗應熊意用其

私人王維章撫蜀言維章官西寧坐加徵激變落職聞往捷朦朧啟事明肆奸欺帝責捷自陳捷詆淑泰黨同伐異帝不問時皇陵被毀巡撫楊一鵬得罪應熊以座主故力庇之淑泰發其停置章奏狀帝亦不究淑泰乃撫應熊納賄數事上之應熊捐貲助陵工淑泰又劾其召寇庇奸帝責以挾私求勝終不納十一年冬上疏言今以措餉故至搜括借助即行之而得再有兵事能復行乎治不規其可久徒倉皇於補救之術非所以為忠也陛下方以清節風天下而乃條敘百官金錢於多寡之間是教之貪也至借貸之說尤不可行京師根本重

地邇者物力困竭富商大賈大半旋歸內不安何以攘
外乞立寢其說又言強兵莫如行法今之兵索餉則強
赴敵則弱殺良冒功則強除暴救民則弱請明示法令
諸將能用命殺賊者立擢爲大將否則死無赦母以降
級戴罪徒爲不切身之痛癢帝是其言十五年遷吏科
典浙江鄉試事竣還家十二月
大清兵圍兗州淑泰竭力固守城破死之詔贈太僕少
卿官一子

高名衡字仲平沂州人崇禎四年進士除如臯知縣以
才調興化徵授御史十二年出按河南明年期滿留再
巡一年十四年正月李自成陷洛陽乘勝遂圍開封巡
撫李仙風時在河北名衡集眾守周王恭楊發庫金百
萬兩募死士殺賊烝米屑麥糞以餉軍凡七晝夜仙
風馳還開封副將陳永福背城而戰斬首二千游擊高
謙夾擊斬首七百賊解去仙風既還與名衡互許奏帝
以陷福藩罪謫遼仙風以襄陽兵備副使張克儉代克
儉已前死難卽擢名衡右僉都御史化之以永福充總
兵官都督僉事鎮守河南當是時賊連陷南陽鄧汝十
餘縣唐徽二王遇害名衡不能救開封周邸圖書文
物之盛甲他藩士大夫望富蓄積充初自成攻之不能

克然欲得而甘心焉十一月杪賊再圍開封永福射自成中其左目破殪上天龍等自成大怒急攻之開封故宋汴都金帝南遷所重築也厚數丈內堅緻而城外賊用火藥放迸火發卽外擊轟飛鳴賊騎皆糜爛自成大驚會楊文岳援兵亦至乃解圍去西華郟襄惟陳大康商邱寧陵考城俱陷四月復至開封圍而不攻欲坐困之六月帝詔釋故尚書侯恂於獄命督保定山東河北湖北諸軍務竝轄平賊等鎮援勅官兵故知縣蘇京王漢王燮爲御史詔蘇京監延寧甘肅軍趣孫傳庭出關王漢監平賊鎮標楚蜀軍回侯恂等急擊王燮監楊

光祿等軍刻期渡河總兵許定國以晉軍次洛水一夕賊法寧武兵亦潰於懷慶詔速定國七月河上之兵潰詹師丁啓睿保督楊文岳合左良玉虎大威楊德政方國安諸軍次於朱仙鎮良玉走還襄陽諸軍皆潰啓睿文岳奔汝寧詔山東總兵趙澤清援開封城中食盡卒衡永福偕監司梁炳蘇維英士請同知蘇茂約通判彭士奇推官黃澍等守益堅澤清以兵來援諸軍並集河北朱家寨不敢進澤清曰朱家寨去開封八里我以兵五千南渡依河而營引水環之以次結八營直達大堤築甬道輸河北之粟以餉城中賊兵已老可一戰走

也諸軍皆曰善乃以兵三千人先渡立營賊攻之戰三晝夜諸軍無繼者甬道不就澤清拔營歸日夜望傳庭出關不至賊圖開封者三士馬損傷多積憤誓必拔之曰半年師老糧匱欲決黃河灌之以城中子女貨寶猶豫不決聞秦師已東恐諸鎮兵夾擊欲變計會有獻計於巡按御史嚴雲京者請決河以灌賊雲京語名衡澍名衡澍以爲然周王恭揚募民築羊馬牆堅厚如高岸賊營直傅大堤河決賊可盡城中無虞我方豎宋家寨口賊知移營高阜艤艘巨筏以待而驅掠民夫數萬反決馬家口以灌城九月癸未望夜半二口並決天大雨

逆旬黃流驟漲聲聞百里丁夫荷鍤者隨堤漂沒十數萬賊亦沉萬人河入自北門貫東南門以出流入於渦水名衡永福乘小舟至城頭周王率其宮眷及寧鄉諸郡王避水棲城樓坐而絕食者七日王變以舟迎王王從城上泛舟出名衡等皆出茂灼土奇久餓不能起竝溺死賊浮艦入城遺民俱盡拔營而西城初圍時百萬戶後饑疫死者十二三汴梁住麗甲中州羣盜心豔之至是盡沒於水帝聞痛悼猶念諸臣拒守勞命敘功加名衡兵部右侍郎名衡辭以疾卽擢王漢右僉都御史代名衡巡撫河南名衡歸未幾

大清兵破沂州名衛夫婦殉難王漢字子房掖縣人崇禎十年進士除高平知縣調河內禽巨寇天壇山劉二又乘雪夜破妖僧智善夜半渡河破賊楊六郎李自成圍開封漢然火金龍口柳林爲疑兵遣死士入賊中聲言諸鎮兵來援各數十萬至矣賊聞則驚走漢爲人負氣愛士人有一長嗟歎之不容口僚屬紳士陳民疾苦或言已過則瞿然下拜用兵士卒同甘苦人樂爲之死好用間賊中虛實莫不知攻天壇山賊山陡絕登者輒以布漢持刀直上人服其勇時賊氛日熾帝每臨朝而歎漢前後破賊功降旨優敘十五年春以減俸行取入

補與蘇京王燮同召對稱旨命三臣皆以試御史監軍漢監平賊鎮標楚蜀軍與督臣侯恂南援汴時兵部奏援勦兵十萬十之四以屬京燮屬漢以其六漢所監凡五萬九千然大半已潰散兵部空名使之漢乃請自立標營兵千人騎二百報可乃簡保管兵百餘人募邯鄲鉅鹿壯士三百人又取故治河內所練義兵及修武濟源素從征勦者五百人及親故子弟合千人八月朔夜半襲賊范家灘斬一紅甲賊目檄諸將合勦自走襄陽督左良玉兵救汴至潼關有詔漢巡按河南時賊灌開封漢聞趣諸將自柳園夜半渡河伏兵西岸檄卜從善

等夾攻之斬首九十餘級遂入汴大張旗鼓爲疑兵追賊至朱仙鎮連戰皆捷巡撫高名衡謝病卽擢漢右僉都御史代之漢乃廣間諜收土豪議屯田謀所以圖賊無何劉超反永城超永城人跛而狡爲貴州總兵坐罪免上疏言兵計陳新甲用爲河南總兵以私怨殺其鄉官御史魏景琦一家三十餘人懼罪遂據城反漢上疏請討語洩超得爲備明年正月漢入永城聲言招撫爲賊所殺參將陳治邦遊擊連光耀父子皆戰死遊擊馬魁負漢屍以出面如生詔贈兵部尚書廕錦衣世百戶建祠致祭旣而超伏誅傳首九邊

字九一長洲人生未期而孤稍長砥行有時名與楊廷樞相友善廷樞復社諸生所稱維斗先生者也天啓五年魏大中被逮過蘇州沂貸金資其行周順昌被逮緹騎橫索錢沂與廷樞斂財經理之嘗是時沂廷樞名聞天下崇禎元年沂成進士改庶吉士授檢討三年廷樞舉應天鄉試第一中允黃道周以救錢龍錫貶官倪元璐道周同年生請以已代謫帝不允沂上疏頌道周元璐賢且自請罷黜帝詰責沂沂曰推賢讓能蓋臣所務難進易退儒者之風問者陛下委任之意希注外廷防察之權輒逮闈寺默窺聖意疑貳漸萌萬一

士風日賤宸嚮日移明盛之時爲憂方大帝不聽沂尋
乞假歸還朝遷右庶子充日講官十四年奉使益王府
便道還家當是時復社諸生氣甚盛沂與廷樞顧杲華
允誠等往復尤契居久之京師陷福王召沂爲少詹事
沂以國破君亡臣子不當叨位且痛宗社之喪亡由朋
黨相傾移書當事勸以力破異同之見旣就職陳時政
七事惓惓以化恩讐去偏黨爲言而安遠侯柳祚昌疏
攻沂謂朝服謁潞王於京口自恃東林巨魁與復社揚
廷樞顧杲諸奸狼狽相倚陛下定鼎金陵彼爲討金陵
檄所云中原逐鹿南國指馬是何語乞置沂於理除廷

樞杲名其餘徒黨容臣次第糾彈時國事方棘事亦竟
寢沂移疾歸明年南京失守蘇常相繼下沂慨然太息
作書戒二子投虎邱新塘橋下死郡人赴哭者數千人
時又有一人儒冠藍衫而來躍虎邱劍池中土人憐而
葬之卒不知何人也於是廷樞聞變走避之鄧尉山中
久之四方弄兵者羣起廷樞負重名咸指目廷樞當事
者執廷樞好言慰之廷樞嫚罵不已殺之蘆墟泗洲寺
首已墮聲從項中出益厲門人進紹原購其屍葬焉沂
子枋字昭法舉十五年鄉試枋依隱有高行云
鹿善繼字伯順定興人祖久徵萬曆中進士授息縣知

縣時詔天下度田各署上中下筮息獨以下田報曰度田以紓民乃病民乎調襄垣擢御史以言事謫澤州判官遷榮澤知縣未任而卒父正苦節自礪縣令某欲見之方糞田投鍤而往急人之難傾其家不惜遠近稱鹿太公善繼端方謹慤由萬曆四十一年進士授戶部主事內艱除起故官遼左餉中絕廷臣數請發帑不報會廣東進金花銀善繼稽舊制金花貯庫備各邊應用乃奏記尚書李汝華曰與其請不發之帑何如留未進之金汝華然之帝怒奪善繼俸一年趣補進善繼持不可以死爭乃奪汝華俸二月降善繼一級調外汝華懼卒

補銀進泰昌改元復原官典新餉連疏請帑百萬不報天啓元年遼陽陷以才改兵部職方主事大學士孫承宗理兵部事推心任之及閱視關門以善繼從出督師復表爲贊畫布衣羸馬出入亭障間延見將卒相勞苦拓地四百里收復城堡數十承宗倚之若左右手在關四年累進員外郎郎中承宗謝事善繼亦告歸先是楊左之獄起魏大中子學伊左光斗弟光明先後投鹿太公家太公客之與所善義士容城舉人孫奇逢謀持書走關門告其難於承宗承宗善繼謀借巡視薊門請入覲奄黨大譁謂閣部將提兵清君側嚴旨阻之獄益急

五日一追賊榜掠甚酷太公急募得數百金輸之而兩
人者財皆已斃矣至是善繼歸而周順昌之獄又起順
昌善繼同年生善繼又爲募得數百金入而順昌又
斃奄黨居近善繼家難家子弟僕從相望於道太公曰
吾不懼也崇禎元年逆璫旣誅善繼起尚寶卿遷太常
少卿管光祿丞事再請歸九年七月

大清兵攻定興善繼家在江村白太公請入扞城太公
許之與里居知州薛一鶚等共守守六日而城破善繼
死家人奔告太公太公曰嗟乎吾兒素以身許國今果
死吾復何憾事聞贈善繼大理卿諡忠節敕有司建祠

于化麟舉天啓元年鄉試第一伏闕訟父忠踰年亦卒
薛一鶚字百當由貢生爲黃州通判荆王姬誣他姬醜
世子一鶚白其誣奄人傳太妃命欲竟其獄卒直之遷
蘭州知州州北有田沒於番吏派其賦於他戶後田復
歸爲衛卒所據而民出賦三十年一鶚核除其害至是
佐善繼城守遂同死

贊曰士大夫致政里居無封疆民社之責可遜迹自全
非以必死爲勇也然而忼慨捐軀冒白刃而不悔湛宗
覆族君子哀之豈非名義所在有重於生者乎氣節凜
然要於自遂其志其英風義烈固不可泯沒於宇宙間

矣

史卷二百六十七終

明史卷二百六十八

列傳第一百五十六

敕修

總裁官總理事務 經筵講官保兼太子太保和殿大學士兼管吏部尚書事加級張廷玉奉

曹文詔 弟文耀

周遇吉

黃得功

曹文詔大同人勇毅有智畧從軍遼左歷事熊廷弼孫承宗積功至遊擊崇禎二年冬從袁崇煥入衛京師明年二月總理馬世龍界所賜尚方劍令率參將王承允張叔嘉都司左良玉等伏玉田枯樹洪橋鏖戰有功遷參將自大壘山轉戰逼遵化又從世龍等克大安城及

鮎魚諸關以興復四城功加都督僉事七月陝西賊熾
擢延綏東路副總兵賊渠王嘉允久據河曲四年四月
文詔克其城嘉允脫走轉掠至陽城南山文詔追及之
其下斬以降以功擢臨洮總兵官點燈子自陝入山西
文詔追之及於稷山諭降七百人點燈子遁尋被獲伏
誅李老柴獨行狼陷中部巡撫練國事延綏總兵王承
恩圍之五月慶陽賊郝臨菴劉道江援之會文詔西旋
與榆林參政張福臻合勦馘老柴及其黨一條龍餘黨
奔摩雲谷副將張弘業遊擊李明輔戰死文詔乃與遊
擊左光先崔宗允李國奇分勦綏德宜君清澗米脂賊

戰懷寧川黑泉峪封家溝綿湖峪皆大捷掃地王授首
紅軍友李都司杜三楊老柴者神一魁餘黨也屯鎮原
將犯平涼國事檄甘肅總兵楊嘉謨副將王性善拒之
賊走慶陽文詔從鄜州間道與嘉謨性善合五年三月
大戰西濠斬千級生禽杜三楊老柴餘黨緝他賊掠武
安監陷華亭攻莊浪文詔嘉謨至賊屯張麻村官軍掩
擊賊走高山遊擊曹變蛟馮舉劉成功平安等謀而上
賊潰走變蛟者文詔從子也會性善及甘肅副將李鴻
嗣參將莫與京等至共擊斬五百二十餘級追敗之咸
寧關又敗之關上嶺追至隴安嘉謨變蛟夾擊復敗之

賊餘衆數千欲走漢南爲遊擊趙光遠所遏乃由長寧
驛走張家川其逸出清水者副將蔣一陽遇之敗都司
李宮用被執文詔乃縱反間給其黨殺紅軍友遂蹙敗
之水落城追至靜寧州賊奔據唐毛山變蛟先登殄其
衆可天飛郝臨庵劉道江爲王承恩所敗退保鐵角城
獨行狼李都司走與合可天飛劉道江遂圍合水文詔
往救賊匿精銳以千騎逆戰誘抵南原伏大起城上人
言曹將軍已歿文詔持矛左右突匹馬縈萬衆中諸軍
望見夾擊賊大敗僵屍蔽野餘走銅川橋文詔率變蛟
舉嘉謨及參將方茂功等追及之大戰陷陣賊復大敗

尋與寧夏總兵賀虎臣固原總兵楊麒破賊甘泉之虎
兕回旗復追賊安口河崇信窑白茅山皆大獲總督洪
承疇斬可天飛李都司於平涼降其將白廣恩餘賊分
竄文詔追擊之隴州平鳳間十月三戰三敗之遂蹙賊
擬州雖予山其黨殺獨行狼郝臨庵以降承疇戮四百
人餘散遣關中巨寇畧平巡撫御史范復粹彙奏首功
凡三萬六千六百有奇文詔功第一嘉謨次之承恩麒
又次之文詔在陝西大小數十戰功最多承疇不爲敘
巡按御史吳姓推獎甚至復粹疏復上兵部抑其功卒
不敘當是時賊見陝兵盛多流入山西其魁紫金梁混

世王姬關鎖八大王曹操闖塌天興加哈利七大部多者萬人少亦半之蹂躪汾州太原平陽御史張宸極言賊自秦中來秦將曹文詔威名宿著士民爲之謠曰軍中有一曹西賊聞之心膽搖且嘗立功晉中而秦賊滅且盡宜敕令入晉協勦於是命陝西山西諸將並受文詔節制六年正月抵霍州敗賊汾河孟縣追及於壽陽巡撫許鼎臣遣謀士張宰先大軍嘗賊賊驚潰六月文詔追擊之斬混世王於碧霞村餘黨爲猛如虎逐走遇文詔兵方山復敗五臺孟定襄壽陽賊盡平鼎臣命文詔軍平定備太原東張應昌軍汾州備太原西文詔連

敗賊大谷范村榆社太原賊幾盡帝以文詔功多敕所過地多積糗糧以犒並敕文詔速平賊山西監視中官劉中允言文詔勦賊徐溝孟定襄所司不給米反以礮石傷士卒帝卽下御史按問三月賊從河內上太行文詔大敗之澤州賊走潞安文詔至陽城遇賊不擊自沁水潛師還擊之芹地劉村寨斬首千餘四月賊屯潤城其他部陷平順殺知縣徐明揚文詔至賊走乃夜半襲潤城斬賊千五百紫金梁老回回自榆社走武鄉過天星走高澤山文詔皆擊敗他賊圍涉縣聞文詔破賊黎城解去五月帝遣中官孫茂霖爲文詔內中軍賊犯沁

水文詔大敗之禽其魁大虎又敗之遼城毛嶺山西賊
既屢敗乃避文詔鋒多流入河北帝乃命文詔移師往
討而賊已敗鄧垓兵於林縣文詔率五營軍夜襲破之
七月大敗懷慶賊柴陵村敵其魁滾地龍又追斬老回
回於濟源文詔在洪洞時與里居御史劉合譽忤及是
令譽按河南而四川石砮土官馬鳳儀軍敗沒於侯家
庄賴文詔馳退賊甫解甲與合譽相見語復相失文詔
拂衣起面叱之令譽怒遂以鳳儀之敗爲文詔罪部議
文詔怙勝而驕乃調之大同七年七月山西巡撫中
大清兵西征插漢還師入大同境攻拔得勝堡參將李

全自經遂攻圍懷仁縣及井坪堡應州文詔備獲督張
宗衡先駐懷仁固守八月圍解卽移駐鎮城挑戰敗還
已而靈邱及他屯堡多失陷商州城去城三十里營水
大清兵亦旋十一月論罪文詔宗衡及巡撫胡沾恩並
充軍邊衛令甫下山西巡撫吳牲薦文詔知兵善戰請
用之晉中乃命爲援勦總兵官立功自贖當是時河南
禍尤劇帝已允兵部議敕文詔馳勦河南賊牲復抗疏
力爭請令先平晉賊後入豫帝不許而文詔以牲有恩
竟取道太原爲牲所留會或高加計已殲而鳳陽告陷
遂整兵南以八年三月會總督洪承疇於信陽承疇大

喜卽合擊賊隨州文詔追斬賊三百八十有奇四月承
疇次汝州以賊盡入關中議還顧根本分命諸將扼要
害檄文詔入關文詔乃馳至靈寶謁承疇承疇以賊在
商維聞官兵至必先走漢中而大軍由潼關入反在其
後乃令文詔由閿鄉取山路至維南商州直擣賊巢復
從山陽鎮安洵陽馳入漢中過其奔軼曰此行也道路
回遠將軍甚勞苦吾集關中兵以待將軍拊其背而遣
之文詔躍馬去五月五日抵商州賊去城三十里營火
滿山文詔夜半率從子參將變蛟守備鼎蛟都司白廣
恩等敗賊深林中追至金嶺川賊據險以千騎逆戰變

蛟大呼陷陣諸軍竝進賊敗走變蛟勇冠三軍賊中聞
大小曹將軍名皆怖懼已而闖王八大王諸賊犯鳳翔
趨汧陽隴州文詔自漢中馳赴賊盡向靜寧泰安清水
秦州間衆且二十萬承疇以文詔所部合張全昌張外
嘉軍止六千衆寡不敵告急於朝未得命六月官軍遇
賊亂馬川前鋒中軍劉弘烈被執俄副將艾萬年柳國
鎮復戰死文詔聞之瞋目大罵亟詣承疇請行承疇喜
曰非將軍不能滅此賊顧吾兵已分無可策應者將軍
行吾將由涇陽趨淳化爲後勁文詔乃以三千人自寧
州進遇賊真寧之湫頭鎮變蛟先登斬首五百追三十

里文詔率步兵繼之賊伏數萬騎合圍矢蝟集賊不知
爲文詔也有小卒縛急大呼曰將軍救我賊中叛卒識
之甚賊曰此曹總兵也賊喜圍益急文詔左右跳蕩手
擊殺數十人轉鬪數里力不支拔刀自刎死遊擊平安
以下死者二十餘人承疇聞拊膺大哭帝亦痛悼贈太
子太保左都督賜祭葬世廕指揮僉事有司建祠春秋
致祭文詔忠勇冠時稱明季良將第一其死也賊中爲
相慶弟文耀從兄在討數有功河曲之戰斬獲多後擊
賊忻州戰死城下詔予贈卹從子變蛟自有傳
周遇吉錦州衛人少有勇力好射生後入行伍戰輒先

登積功至京營遊擊京營將多勛戚中官子弟見遇吉
質魯意輕之遇吉日公等皆統袴子豈足當大敵何不
於無事時練膽勇爲異日用而徒糜廩祿爲同輩戚目
笑之崇禎九年都城被兵從尚書張鳳翼數血戰有功
連進二秩爲前鋒營副將明年冬從孫應元等討賊河
南戰光山固始皆大捷十一年班師進秩受資明年秋
復出討賊破胡可受於浙川降其全部楊嗣昌出師襄
陽遇吉從中官劉元斌往會會張獻忠將至房縣嗣昌
策其必窺渡鄖灘遣遇吉扼守槐樹關張一龍屯光化
賊遂不敢犯十二月獻忠敗於興安將走竹山竹溪遇

吉復以嗣昌令至化石街草店扼其要害賊自是盡入
蜀遇吉乃從元斌駐荆門專護獻陵明年與孫應元等
大破羅汝才於豐邑坪又明年與黃得功追破賊鳳陽
已而旋師敗他賊李青山於壽張追至東平殲滅幾盡
青山遂降屢加太子少保左都督十五年冬山西總兵
官計定國有罪論死以遇吉代之至則汰老弱繕甲仗
練勇敢一軍特精明年十二月李白成陷全陝將犯山
西遇吉以沿河千餘里賊處處可渡分兵扼其上流以
下流瀟坂屬之巡撫蔡懋德面請濟師於朝朝廷遣副
將熊通以二千人來赴十七年正月遇吉令通防河會

平陽守將陳尚智已遣使迎賊諷通還鎮說降遇吉叱
之曰吾受國厚恩寧從爾叛逆且爾統兵二千不能殺
賊反作說客邪立斬之傳首京師至二月七日太原陷
懋德死之賊遂陷忻州圍代州遇吉先在代遇其北犯
乃憑城固守而潛出兵奮擊連數日殺賊無算會食盡
援絕退保寧武賊亦踵至大呼五日不降者屠其城遇
吉四面發大礮殺賊萬人火藥且盡外圍轉急或請甘
言給之遇吉怒曰若輩何怯邪今能勝一軍皆忠義卽
不支縛我子賊於是設伏城內出弱卒誘賊入城亟下
闌殺數千人賊用礮攻城圯復完者再傷其四驍將自

成懼欲退其將曰我衆百倍於彼但用十攻一奮進蔑不勝矣自成從之前隊死後復繼官軍力盡城遂陷遇吉巷戰馬蹶徒步跳蕩手格殺數十人身被矢如蝟竟爲賊執大罵不屈賊懸之高竿叢射殺之復齶其肉城中士民感遇吉忠義巷戰殺賊不可勝計其舍中兒先從遇吉出鬪死亡畧盡夫人劉氏素勇健率婦女數十人據山巔公解登屋而射每一矢斃一賊賊不敢逼縱火焚之闔家盡死自成集衆計曰寧武雖破吾將士死傷多自此達京師歷大同陽和宣府居庸皆有重兵倘盡如寧武吾部下寧有孑遺哉不如還秦休息圖後舉

期將遁而大同總兵姜瓖降表至自成大喜方宴其使者宣府總兵王承廕表亦至自成益喜遂決策長驅歷大同宣府抵居庸太監杜之秩總兵唐通復開門延之京師遂不守矣賊每語人曰他鎮復有一周總兵吾安得至此福王時贈太保謚忠武列祀旌忠祠

黃得功號虎山開原衛人其先自合肥徙早孤與母徐居少負奇氣膽畧過人年十二母釀酒熟竊飲至盡母責之笑曰償易耳時遼事急得功持刀雜行伍中出斬首二級中賞率得白金五十兩歸奉母曰兒以償酒也由是隸經畧爲親軍累功至遊擊崇禎九年遷副總兵

分管京衛營十一年以禁軍從總督熊文燦擊賊於舞陽
陽慶光固間最八月又從擊賊馬光玉於浙川之吳村
王家寨大破之詔加太子太師署總兵銜十三年從太
監盧九德破賊於板石畝賊革裏眼等五營降十四年
以總兵與王憲分護鳳陽泗州陵得功駐定遠張獻忠
攻桐城挾營將廖應登至城下誘降得功與劉良佐合
兵擊之於鮑家嶺賊敗遁追至潛山禽斬賊將闖世王
馬武三鷓子王興國三鷓子獻忠養子最號驍勇者也
得功箭傷面愈自奮與賊轉戰十餘日所殺傷獨多明
年移鎮廬州十七年封靖南伯福王立江南進封侯旋

奇史劉良佐劉澤清高傑爲四鎮初督輔史可法慮傑
難制故置得功儀真陰相牽制迺登萊總兵黃蜚
將之任蜚與得功同姓稱兄弟移書請兵備非常得功
率騎三百由揚州往高郵迎之傑副將胡枝憤馳報傑
傑素忌得功又疑圖已乃伏精卒道中邀擊之得功行
至土橋方作食伏起出不意上馬舉鐵鞭飛矢兩集馬
蹄騰他騎馳有驍騎舞槊直前得功大呼反鬪挾其槊
而撲之人馬皆糜復殺數十人跳入頽垣中哮聲如雷
追者不敢進遂疾馳至大軍得免方闕時傑潛師擣儀
真得功兵頗傷而所俱行三百騎皆歿遂訴於朝願與

傑決一死戰可法命監軍萬元吉和解之不可會得功
有母喪可法來弔語之曰士橋之役無智愚皆知傑不
義今將軍以國故捐盛怒而歸曲於高是將軍收大名
於天下也得功色稍和終以所殺亡多爲恨可法令傑
贖其馬復出千金爲母贖得功不得已聽之明年傑欲
趨河南規取中原詔得功與劉良佐守邳徐傑死得功
還儀真傑家并將士妻子尚留揚州得功謀襲之朝廷
急遣盧九德諭止得功遂移鎮廬州四月左良玉東下
以清君側爲名至九江病死軍中立其子夢庚命得功
趨上江禦之駐師荻港得功破夢庚於銅陵解其圍命

毛家鎮太平一意辦賊論功加左柱國時其大東卡
大清兵已渡江知福王奔分兵襲太平得功方收兵屯
蕪湖福王潛入其營得功驚泣曰陛下死守京城臣等
猶可盡力奈何聽奸人言倉卒至此且臣方對敵安能
扈駕王曰非卿無可仗者得功泣曰願效死得功戰荻
港時傷臂幾墮衣葛衣以帛絡臂佩刀坐小舟督麾下
人總兵結束前迎敵而劉良佐已先歸命大呼岸上招
降得功怒叱曰汝乃降乎忽飛矢至中其喉偏左得功
知不可爲擲刀捨所拔箭刺吭死其妻聞之亦自經總
兵翁之琪投江死中軍田雄遂挾福王降得功粗猛不

識文義江南初立王詔書指揮多出羣小得功得詔紙
或對使罵裂之然忠義出天性聞以國事相規誠者輒
屈已改不旋踵北來太子之獄得功抗疏爭曰東宮未
必假冒先帝子卽上子未有了無證明混然雷同者臣
恐在廷諸臣諂佞者多抗顏者少卽明白識認亦不敢
抗詞取禍矣時太子真偽莫敢決而得功忠憤不阿如
此得功每戰飲酒數斗酒酣氣益厲喜持鐵鞭戰鞭漬
血沾手腕以水濡之久乃得脫軍中呼爲黃鬪子始爲
偏裨隨大帥立功名未嘗一當大敵及專鎮封侯不及
一年餘而南北轉徙主逃將潰無所一用其力束手就

殪與國俱亡而已其軍行紀律嚴下無敢犯所至人感
其德廬州桐城定遠皆爲立生祠葬儀真方山母墓側
贊曰曹文詔等秉驍猛之資所向摧敗皆所稱萬人敵
也大命旣傾良將顛蹶三人者忠勇最著死事亦最烈
故別著於篇

明史卷二百六十八終

明史卷二百六十九

列傳第一百五十七

總督官總理事務 經筵講官保舉太子太保保和殿學士兼管吏部尋擢學士級張廷玉等奉

敕修

艾萬年

李甲

湯九州

楊正芳

楊世恩

陳于王

程龍等

侯良柱

子天錫

張令

汪之鳳

猛如虎

劉光祚等

虎大威

孫應元

姜名武

王來聘等

尤世威

王世欽等

侯世祿

子拱極

劉國能

李萬慶

艾萬年米脂人由武學生從軍積功至神上參將崇禎
四年從曹文詔復河曲點燈子八山西萬年從文詔連
敗之桑落鎮花地窰霧露山都司王世虎守而姚進忠
戰死賊退屯石樓之康家山西距河三十里綏德知州
周士奇守備孫守法伏兵舍峪渡河襲殺之五年從參
政樊一蘅討平不沾泥山西告警隸文詔東討與李卑
一月奏五捷又與賀人龍敗八大王掃地王兵明年賊
將東遁連破之延安山亢義村賈寨村擢副總兵初山
西既中賊其土寇亦乘間起三關王剛孝義通天柱臨
縣王之臣皆殘破城邑後見賊衰相繼歸順然陰結黨

不散巡撫戴君思新視事謀誅之七年正月迎春召王
剛宴殺之并殺通天柱於他所而萬年亦捕殺王豹五
與其黨領兵王生禽翻山動姬關鎖掌世王獻俘京師
晉中巨盜畧靖豹五卽之臣也有議君思殺降者給事
中張第元力言諸賊蹂躪之慘請錄萬年功萬年直達
疾告歸尋加署都督僉事八年二月上疏言臣仗劍從
戎七載復府谷解孤山圍救清水黃甫木瓜十一營堡
轉戰高山設伏河曲有馬鎮虎頭巖石臺山西川之捷
戰平陽汾州太原復臨縣及驪亭驛大小數十戰精力
盡耗與臣共事者李卑濫先朝露臣病勢奄奄猶力戰

冀北又撫勦王剛豹王領兵王通天柱解散賊一萬三千有奇蒙恩許臣養病而督臣洪承疇檄又至臣不敢不力疾上道但念滅賊之法不外勦撫今勦撫俱未合機宜臣不得不極言夫勦賊不患賊多患賊走蓋疊嶂重巒皆其淵藪兵未至而賊先逃所以難滅其故則兵寡也當事非不知兵寡因糗糧不足爲苟且計日引月長以至於今雖多措餉多設兵而已不可救矣宜合計賊衆多寡用兵若干餉若干度其足用然後審察地利用正用奇用伏用間或擊首尾或衝左右苟不即時殄滅者臣不信也次則行堅壁清野之法困賊於死地然

後可言撫蓋羣賊攜妻挈子無城柵無輜重暮楚朝秦傳食中土以剽掠爲生誠令附近村屯移入城郭儲精兵火器以待之賊衣食易盡生理一絕烏驚鼠竄然後選精銳據要害以擊之或體陛下好生之心添厥渠魁宥其脅從不傷仁不損威乃撫勦巨寇帝深嘉之下所司議行然卒不能用其策也尋授孤山副總兵戍平涼當是時總督洪承疇追六月滅賊之期急進戰諸將見賊衆兵寡咸自揣不敵而勢不可止萬年及副將劉成功柳國鎮遊擊王錫命合兵三千以六月十四日至寧州之襄樂遇賊大戰斬首數百伏兵驟起圍之數重萬

年國鎮力戰不支皆戰歿成功錫命負重傷歸士卒死者千餘人事聞贈恤如制

李甲字侍平榆林人由千總擢守備天啓初總督王象乾設薊鎮車營五以甲爲都司僉書統西協後車營遷山海關遊擊坐事罷歸崇禎二年陝西巡撫劉廣生議討延慶回賊三道進兵命甲與遊擊伍維濟等由西路入甲簡精騎二百追擊兩晝夜行四百里抵保安寧寨連破之共獲首功一千有奇旋起延安參將時羣盜蠶起延安尤甚甲連敗之富家灣松樹屯四年神一元陷保安甲與寧夏總兵賀虎臣守延安賊不敢犯尋擢孤

山副總兵譚雄陷安塞據其城甲與王承恩擊降雄戮之斬首五百三十餘級五年春混天猴陷宜君郢州其夏攻合水甲及參將馬科追至甘泉山七月破之延水關斬首六百二十餘級其地東限黃河賊溺死者無算科部卒斬混天猴以獻初甲及遊擊吳國俊等斬賊魁三人於甘泉橋子溝尋勦賊固原斬其魁薛仁貴等三人時陝西賊多流入山西詔甲及賀人龍各率部卒千隸總督張宗衡麾下會王自用陷遼州聞官兵至棄城走六年春諸軍入城多殺良民冒功甲獨嚴戢其下無所擾已敗賊陽城之郎家山又與艾萬年連敗之南獨

泉土河村復敗之。荒堰村賊入濟源山中，巡撫許鼎臣檄畢萬年合勦，畢破之。天井關七月臨洮總兵曹文詔改大同命畢代署其事，協討河北賊，加都督僉事。數有功，其冬賊盡走河南，命畢援勦。七年春，敗賊內鄉，馳至光化，與楚兵敗賊蓮花坪、白溝坪，實授臨洮總兵。官討賊湖廣，賊多聚，即襄總理盧象昇方倚畢辦賊。六月卒於官，畢善持紀律，所至軍民安堵，爲人有器度，當倉猝鎮靜如常，贈右都督，賜祭葬。

湯九州，石埭人。崇禎時爲昌平副總兵。六年夏，流賊大擾河北，畿南命九州協勦，與左良玉等屢破賊，兵賊悉

而南。其冬大敗過天星於吳城鎮，斬首四百一十六級，追賊闖天王等五華集，又敗之，斬首六百四十餘級。七年擊賊高縣之潭頭，斬首三百二十級，賊駐商維謀，再入山西，左良玉迎擊於商南，九州遣部將趙柱、周爾敬逆之，雒南賊至商州，返已復，侵閩鄉九州，病遣部將凌元機、胡良翰等搜山，悉敗，歿九州，尋赴援山西，未幾以河南勦賊功加署都督僉事。八年春被劾，褫官從軍，自效。洪承疇入關，以吳村瓦屋爲商南賊走內鄉、浙川要地，令九州偕良玉扼之，尋移駐洛陽。九年二月賊走登封、石陽關，與伊嵩賊合九州期，良玉夾擊，良玉半道

歸九州以孤軍千二百人由嵩縣深入賊屢敗窮追四十餘里悞入深崖遇賊數萬據險攻圍九州勢不敵夜移營爲賊所乘遂戰歿從孫文瓊伏闕三上書請恤不報文瓊後亦殉難時有楊正芳者天啓間以小校從軍屢勦貴州賊積功至副總兵叙桃紅壩功加署都督同知崇禎三年擊破定番叛苗七年賊陷富陽正芳以鎮守兵敗賊班鳩灘復其城湖廣巡撫唐暉以獻陵惠藩爲重令正芳及總兵許成名專護荊州承天正芳連奏金沙鋪蓮花坪白溝坪官田石門山之捷陳奇瑜出師鄖陽正芳偕成名鄧垵從竹山竹溪白河分道進皆大

獲至十月正芳督軍兵千餘援維南戰敗及部將張上選皆死焉一軍盡歿贈太子少師左都督世廕指揮同知再廕一子守備賜祭葬有司建祠又有楊世恩者崇禎時歷官湖廣副總兵七年春收賊竹溪大兩山水驟發賊多漂溺死餘潰走世恩疾擊斬鎮山虎等四十餘人已追賊石河口連戰康家坪納溪功最八年冬敗賊孝感九年春祖寬大破賊滁州世恩從盧象昇馳至復大破之十年春與秦翼明破劉國龍於細石嶺獲其魁新來虎弒陷隨州責戴罪自贖十二年冬督師楊嗣昌令守宜城會賊羅汝才惠登相分屯興山遠安夷陵告

急嗣昌檄世恩及荆門守將羅安邦赴救至洋坪猴兒
洞道險甚嗣昌再檄召還而安邦由祚峪世恩由重陽
坪已兩道深入期至馬良坪合兵汝才登相圍之香油
坪嗣昌連發數道兵往援皆以道遠不能進世恩等被
困久突圍走黃連坪絕地無水土饑渴甚賊至兩軍盡
覆世恩安邦並死

陳于王字丹衷吳縣人世爲蘇州衛千戶旣襲職兩舉
武鄉試授奇兵營守備以捕獲海盜功遷都司僉書守
崇明蛇山盜王一爵等亂海濱于王率戰艦數十擊之
羊山持刀躍入其舟生擒一爵殲其黨殆盡上官交薦

遂知名天啓初經畧熊廷弼用爲標下參將代者至會
于王酒暴卒其子訴于王毒殺之逮繫久不釋崇禎二
年京師有警巡撫曹文衡賞其罪署前鋒遊擊將兵勤
王旣至兵事已解遂南還久之巡撫張國維用爲中軍
守備九年賊入江北圍廬州陷和州國維遣于王守六
合守備蔣若來守江浦賊方圍江浦若來急入與知縣
李維樾固守賊登城若來拒却之絕下角賊矢著其頰
左臂傷裹血還戰賊乃退六合無城若來與于王犄角
捍賊二邑賴以全賊犯宿松于王弟國計偕指揮包文
達等以二千人往救文達敗歿于王驟馬入拔其弟而

出十年正月賊分犯江浦六合及安慶國維遣部將張載賡等援安慶而以新募兵二千令副將程龍及于王若來分戍二邑已而賊不至國維議赴安慶城太湖乃提龍等三將兵西上三月賊犯太湖副將潘可大將安慶兵九百龍等三將將吳中兵三千六百禦之鄧家店賊先犯可大營龍等至夾擊之賊多死夜復至中伏亦敗去監軍史可法欲退扼要害諸將不從掘塹守二十四日羅汝才劉國能等七營數萬衆齊至圍數重諸將突擊頗有殺傷可法借副將許自強馳救扼於賊鳴大礮遙爲聲援諸將亦呼譟突圍會天雨甲重不得出明

日月中賊四面入將士短兵接戰可大戰死龍引火自焚死于王手執大刀左右被賊傷重力竭北面叩頭自刎死聞十日面色如生若來服國人衣以免同死者武舉詹兆鵬首觸石死陸王猷殺賊過當賊鬻分其肉死莫是驍詹世龍及千戶王定遠皆力戰死百戶王弘猷爲賊所執鋸齒斷足罵不絕聲死士卒脫者僅千餘人事聞贈于王昭勇將軍指揮使世廕副千戶餘贈廕有差

侯良柱字朝石永寧衛人天啓初累官四川副總兵討奢崇明父子復遵義城又與參議趙邦清招降奢寅黨

安鑿六年五月代李維新爲四川總兵官鎮永寧時崇
明敗奔水西與安邦彥合貴州兵數討不克崇禎二年
總督朱燮元遣貴州總兵許成名復赤水衛崇明邦彥
以十餘萬衆來爭成名還永寧賊追之銳甚良柱偕監
軍副使劉可訓出戰小却成名等來援賊乃據五峯山
桃紅壩越數日良柱乘賊不備與副將鄧玘等侵早霧
迫之賊大潰成名聞山上呼噪聲亦出賊奔鵝項嶺徑
長而陞人馬不能容良柱玘軍至賊復大敗死者數萬
人崇明邦彥與邦彥黨僞都督莫德竝授首俘其黨楊
作等數千人積年巨寇平時稱西南奇捷四川巡撫張

論上其功不及將成名等怒言邦彥德乃已部將趙
國璽所斬且崇明猶未死燮元信之奏於朝兵部不能
決賞久不行御史孫徵蘭言訊俘因阿癡楊作等咸云
邦彥卽時授首灼然盡其兵力帝卽命獻俘告廟傳首
九邊川中撫按及御史毛羽健皆訟良柱可訓功詆燮
元燮元疏辯且求去賞遂格不行良柱怨燮元不爲用
至與相許奏解職候勘久之御史劉宗祥列上功狀七
年八月始錄前功進良柱左都督世廕錦衣指揮僉事
成名等亦優叙未幾復爲四川總兵官八年夏總督洪
承疇大舉討賊令良柱扼賊入川路戰鳳縣三江口斬

首三百七十有奇明年冬賊犯漢中瑞王遣使乞師良柱督兵援與他將同却賊十年四月川中地震者七地鳴者一占主兵賊果入犯陷南江通江帝切責良柱及巡撫王維章時良柱駐廣元盡召諸地兵九千有奇分防扼險止餘二千人賊知其勢弱五月復寇川北維章告急於朝會賊轉掠他所良柱乃撤還守隘兵專守廣元維章以爲非計上章言之十月李自成過天星混天星等陷寧羌分三道入寇良柱急拒戰於綿州衆寡不敵陣亡賊直逼成都維章方守保寧反在外連失三十餘州縣帝大怒命逮二人下詔獄猶未知良柱死獄成

維章遣戍追奪良柱官十二年良柱子指揮天錫伏闕言臣與賊不共戴天願捐貲繕甲選募勁旅及臣父嘗將自當一隊與賊血戰下雪父耻上報國恩帝深嘉之命授遊擊赴嗣昌軍立功已嗣昌言天錫所將親丁二百六十人及召募精卒五六百人皆剽悍敢戰帝益嘉之再贈一秩

張令永寧宣撫司人天啓元年奢崇明反令爲僞總兵從攻成都令雖爲賊用非其志崇明敗歸永寧令結宋武等乘間禽其僞丞相何若海率衆以降崇明怒殺令一家夷其先墓巡撫朱燮元言令等爲國忘家請優擢

示勸命與武竝授參將後屢從大軍征討頻有功加副
總兵仍視參將事後實授建武遊擊崇禎中屢遷副總
兵鎮川北七年流賊入犯總兵張爾奇以令爲先鋒副
將陳一龍武聲華爲左右翼拒之員山令追至龍潭一
龍等不至函中三矢斬賊百餘級而還賊犯畧陽令又
擊敗之扼保寧漢中諸要害秦賊不敢犯十年冬李自
成等陷四川三十餘州縣總兵侯良柱陣亡令獲免楊
嗣昌之督師也張獻忠等悉奔興安爲令所扼不得入
漢中乃轉寇夔州十三年二月大敗瑪瑙山走岔溪千
江河令鎮興副將方國安大破之令時年七十餘馬上
用五石弩中必洞胸軍中號神弩將獻忠轉入柯家坪
其地亂峯錯峙菁溪道險令率衆追及之分其下爲五
鼓勇爭利賊衆官軍寡國安爲後拒他道逸去令獨深
入被圍居絕阪中屢射賊營應弦斃者甚衆水遠土渴
賴天雨以濟圍終不解襄陽監軍僉事張克儉言於總
督鄭崇儉曰張令健將奈何棄之急令參將張應元汪
之鳳從八台山進總兵賀人龍從滿月槽進三月八日
應元等先至令方與賊鬪呼聲動山谷應元等應之內
外夾擊賊乃敗去令與賊萬餘相持十三日所殺傷過
當其卒僅五千耳時巡撫邵捷春駐重慶遣守黃泥窪

倚令及秦良玉爲左右手後捷春移大昌以令守竹箇
坪防賊逸九月獻忠兵大至令力戰中矢死軍遂敗之
鳳旣解柯家坪圍後與應元同守夔州之土地嶺部卒
多新募獻忠盡銳來攻之鳳應元力戰賊分兵從後山
下突入其營應元突圍出之鳳走他道免山行道渴飲
斗水臥血凝臆而死踰月令亦戰死軍中失二將爲奪
氣

猛如虎本塞外降人家榆林積功至遊擊崇禎五年擊
邢紅狼於高平解其圍明年敗賊壽陽黑山覆姬關鎖
軍已從曹文詔追賊西偃碧霞村斬混世王與頗希牧

逐賊壽陽東又與陳國威馬杰破來遠寨從文詔大破
賊范村國威以步卒三百夜劫賊紅山嶺如虎杰及虜
大威和應詔擊殺九條龍尋以巡撫許鼎臣命由文水
入山勦賊又與大威應詔杰由臯落山勦東犯之賊竝
有功賊流入畿南山西警漸息如虎仍隸鼎臣七年勦
賊沁源敵五條龍如虎驍果善戰與虎大威齊名戴君
恩吳甞相繼爲巡撫竝委任之以功進參將其年冬賊
在河南欲乘冰北渡如虎大威扼之河濱八年二月與
大威國威斬劇賊高加計山西賊盡平用甞薦加副總
兵其冬以防河功加署都督僉事連歲防河及援勦河

南賊勞績甚著十一年冬京師有警如虎督兵勤王明年四月擢薊鎮中協總兵官十三年坐事落職發邊方立功督師楊嗣昌請於朝令從入蜀十一月監軍萬元吉大饗將士於保寧以諸軍進止不一擢如虎爲正總統張應元副之率軍趨綿州分遣諸將屯要害而元吉自間道走射洪扼蓬溪以待賊賊方屯安岳界真官軍且至宵遁抵內江如虎簡驍騎追之元吉應元營安岳城下以扼其歸路十二月張獻忠陷瀘州其地三面阻江惟立石站可北走元吉以賊居絕地將遣大兵南擣其老巢而伏兵旁塞玉蟾寺感賊北竄永川逆而擊之

可盡殄永川知縣已先遁城中止丞簿一二人如虎覓嚮導不可得夜宿西關空舍及抵立石賊已先渡南溪返走關中將賀人龍軍隔水不擊賊遂越成都走漢川德陽渡綿河入巴州明年正月嗣昌親統舟師下雲陽檄諸將陸追賊諸軍乃盡躡賊後賊折而東返歸路悉空不可復過如虎所將止六百騎餘皆左良玉部兵驕悍不可制所過肆焚掠惟參將劉士杰勇敢思立功諸軍從良玉多優閒不戰改隸如虎馳逐山谷風雪中咸怨望謠曰想殺我左鎮跑殺我猛鎮時賀人龍兵已大譟西歸所恃止如虎元吉深憂之賊自巴州至開縣官

明史卷一百九十九 列傳 三十一
軍追之遇諸黃陵城日晡兩作諸將疲乏請詰朝戰士
杰奮曰四旬逐賊今始及之舍弗擊我不能也執戈先
如虎激諸軍繼之士杰所當輒摧陷獻忠登高望官軍
見無後繼密抽壯騎潛行箐谷中乘高大呼馳下良玉
兵先潰士杰及游擊郭開如虎子先捷並戰死如虎率
親兵力戰部將挾上馬潰圍出旗纛軍符盡失乃收殘
卒從嗣昌下荊州及嗣昌死率所部扼德安黃州會疽
發背不能戰退屯承天尋移駐南陽十一月李自成覆
傅宗龍兵乘勢來攻如虎與劉光祚憑城固守用計殺
賊精卒數千已而城破如虎討短兵巷戰大呼衝擊血

盈袍袖過唐府門北面叩頭謝上恩自稱力竭為賊搃
死光祚及分守參議艾毓初古陽知縣姚運熙並死之
唐王亦遇害光祚字鴻基榆林衛人初為諸生棄去及
祖廕歷官延綏游擊崇禎三年奉詔勤王與何可綱等
戰灤州有功遷汾州參將五年與遊擊王尚義敗賊張
有義於臨縣賊還兵犯之軍盡覆光祚僅以身免被徵
未行借諸將復臨縣詔除其罪六年賊犯石樓光祚分
三道擊大敗之斬隔溝飛撲天虎等六人獲首功三百
七十又數敗賊於臨縣永寧撲天飛等詐降光祚設伏
斬之已擊敗賊魏家灣黑茶山七年勦敗王剛餘黨斬

四百餘級加署都督僉事爲山西副總兵敗賊崞縣復其城八年賊渠賀宗漢號活地草者見其黨劉浩然高加計破滅僞乞降光祚伏兵斬之晉中羣盜皆盡乃移光祚於宣府久之命率兵援勦河南十一年連敗賊白果園襄城已擢保定總兵官仍協討河南賊其冬畿輔有警馳還鎮

大清兵薄保定以光祚堅守不攻而去光祚尋從總督孫傳庭南下明年二月

大清兵還至渾河值水漲輜重難渡諸將王樸曹變蛟等相顧不敢擊光祚恇怯尤甚視師大學士劉宇亮劾

奏詔卽軍前正法光祚適報武清捷宇亮乃繫之武清獄而拜疏請寬帝怒罷宇亮論光祚死十四年大學士漚復粹錄囚力言光祚才武命充爲事官戴罪辦賊光祚舉廢將尤翟文等帝亦從之當是時賊已陷河南襄陽中原郡縣大抵殘破光祚士馬無幾督師丁啓睿尤怯光祚雖少有克捷而賊勢轉盛及傅宗龍敗歿於項城南陽震恐光祚適經其地唐王邀與共守城陷遂死虎大威榆林人本塞外降卒勇敢嫺將畧從軍有功累官山西參將崇禎三年冬從總兵尤世祿擊王嘉允於河曲力戰被傷五年從總督張宗德勦賊臨川潞安陽

城沁水連勝之明年從巡撫許鼎臣擊賊介休殲其魁
九條龍時賊去山西遁據輝林武陟山中約二萬餘鼎
臣令曹文詔自黎城入大威猛如虎諸將自臯落山入
賊屢敗尋移大威守平陽七年巡撫吳牲至察諸將中
惟大威如虎沈毅可屬兵事委任之其冬與如虎扼賊
渡河高加計據岢嵐四出剽掠明年三月二將追至忻
代山中加計馬上舞三十筋長挺突陣大威射殺之追
斬其衆五百人餘黨悉平牲薦二人忠勇進大威副總
兵其冬以扼賊功加署都督僉事九年八月畿輔被兵
率師入援明年春命援勦陝西賊遂代王忠爲山西總

兵官上疏言諸將討賊零級不可取生口不可貪封城
不可限帝採納之十一年詔兵部甄別諸大將大威以
稱職增秩其年冬京師戒嚴命總督盧象昇統大威及
宣府總兵楊國柱大同總兵王樸入衛尋從象昇轉戰
至鉅鹿賈莊被圍數匝象昇死焉大威等潰圍出督師
劉宇亮總督孫傳庭皆言大威國柱敢勇身入重圍視
他將異乞令立功自贖大威亦上章請罪帝不從卒解
其任尋令從軍辦賊十四年正月李自成圍開封總督
楊文岳遣大威及副將張德昌先率五千人渡河會賊
已解圍去乃會河南巡撫李仙風於偃師以兵少未敢

擊賊待文岳軍至與賊戰鳴臯大破之又與監軍道任棟挫賊平峪七月自成及張獻忠羅汝才攻鄧州大威從文岳擊破之斬首千餘級陝西總督傅宗龍出關討賊文岳大威會之九月次新蔡抵孟家莊將戰秦帥賀人龍軍先潰大威軍亦潰遂奔沈邱賊連陷河南鄧許再圍開封大威從文岳援之賊引去明年二月師次郟城督師丁啓睿總兵左良玉方與賊鏖戰文岳督大威及馮大棟張鵬翼等合擊賊大敗相持十一晝夜俘斬數千賊遂東陷陳州歸德已復圍開封七月朔啓睿文岳大威及良玉楊德政方國安之師畢會啓睿欲急擊良玉不從先走大威諸軍亦走帝大怒立誅德政黜譴啓睿諸人大威時奔汝寧出攻賊寨中礮死乃免其罪大威爲偏裨最有聲及爲大帥值賊勢益張所將止數千人不能大有所挫然身經數十戰卒死王事論者賢之

孫應元不知何許人歷官京營參將督勇衛營勇衛營卽騰驤武驤四衛也其先隸御馬監專牧馬莊烈帝銳意修武備簡應元及黃得功周遇吉等訓練遂成勁旅崇禎九年秋從張鳳翼軍畿輔有功進副總兵再以功增秩一等明年河南賊熾應元得功慷慨請行帝壯之

發卒萬人監以中官劉元斌盧九德戒毋擾民諸將奉命軍行肅然十二月大破賊鄭州再破之密縣先後斬首千七百明年正月大破之舞陽光山固始四日三捷斬首二千九百有奇賊乃謀犯江北元斌九德南趨潁州護鳳陵密遣應元得功督騎兵扼賊前自南而北破之方家集賊遂由固始走商城錄功加都督僉事已復破之新野又大破之遂平熊文燦方主撫不戰而賊憚應元等多降降者亦不遠叛文燦以此擅撫賊功已而京師有警召應元等還賊遂無所忌帝初聞禁軍屢破賊大喜累加應元都督同知賜銀幣蟒服至是論功遂

進左都督加銜總兵官世廕錦衣副千戶十二年五月張獻忠羅汝才復叛仍命元斌九德監應元得功軍南征應元等馳至南陽會馬光玉屯淅川之吳村偽乞撫規渡漢江應獻忠淅川知縣郭守邦說降其黨許可變胡可受可變卽賊改世王可受則安世王也可變夜至處之東關可受爲光玉所持約未定應元得功趨內鄉掩其背令副將周遇吉等分道別擊之文燦所遣陳洪範亦至八月至小黃河口參將馬文才等力戰可受敗呼曰始與許王約降者我也今歸命遇吉駐馬受之應元得功遂進兵王家寨賊分屯南北兩山用木石塞道

應元率文豸戰其南得功率副將林報國戰其北河南
兵又扼華陽關賊遂大敗光玉遁免元斌至軍檄除可
變可受罪授以官報先後首功三千人及楊嗣昌督師
襄陽令元斌應元戍荆門護獻陵十三年七月與副將
王允成王之綸監軍僉事孔貞會等大破羅汝才於豐
邑坪斬首二千三百生禽五百有奇混世王小秦王皆
降時稱荆楚第一功十五年春擊賊羅山力戰孤軍無
援遂陣歿贈卹如制應元善戰在行間多與黃得功偕
應元死得功勳益顯故其名尤震於世
姜名武字我揚京德州人舉天啓二年武會試授大同

威遠守備崇禎初遷大水峪遊擊築杏山城有功遷宣
府西城參將擊斬大盜王科移守宣府右衛擢通州副
總兵護諸陵有功以故官典保定總督楊文岳中軍兼
忠勇營團練事十五年李自成圍開封急名武從文岳
往授時諸軍望朱仙鎮者十餘萬左良玉最強一夕其
軍大譟突諸營諸營驚潰其軍遂乘亂掠諸營馬羸以
去於是諸營悉奔獨名武一軍堅壁不動侵晨賊大至
督麾下血戰殺數百人力竭被執大罵爲賊磔死贈特
進榮祿大夫右都督廕外衛世襲總旗其子援王來聘
甄奇傑劄乃議贈特進光祿大夫左都督世襲錦衣百

戶疏上踰月而都城陷不果行來聘京師人崇禎四年
中武會試時帝銳意重武舉子運百斤大刀者止來聘
及徐彥琦二人而彥琦不與選帝下考官及監試御史
獄悉貶兵部郎二十二人造詞臣倪元璐等覆閱取百
人視文榜例分三甲傳臚錫宴以前三十卷進呈欽定
一甲三人來聘居首即授副總兵武榜有狀元自來聘
始也來聘既拜命泣然流涕曰上重武若此欲吾儕效
命疆場爾不捐軀殺賊何以報上恩明年孔有德據登
州叛官軍攻之久不下又明年二月以火藥轟城城壞
將士勝入輒爲賊擊退來聘復先登中傷而死天子惜

之贈廕有加奇傑亦官副總兵隸楊文岳麾下從擊賊
河南戰死先是又有鄧祖禹者蘄水人舉萬曆四十七
年武會試授瀋陽守備嘗出戰中矢死夜半復甦創甚
告歸崇禎初起宣府遊擊入衛京師副將申甫軍歿祖
禹力戰蘆溝橋擢涿州參將疏請召對不許入朝上書
聲甚厲爲御史所糾下獄然帝頗採其言久之赦出爲
辰沅參將禽苗酋飛天王張五保斬首千五百級夷其
巢擢副總兵轄德安黃州攻賊土壁山盡掩所獲爲已
有當事將劾之請勦寇自贖乃令援應城將七百人入
城賊大至圍數重祖禹突圍保西城外賊復圍之軍敗

被執賊說降怒罵不屈賊言之再三復罵曰若此須換却心肝賊笑曰換不難遂剖心剜肝而死
尤世威榆林衛人與兄世功弟世祿竝勇敢知名天啓中世威積官建昌營參將調守牆子路七年遷山海中部副總兵寧遠告警從大帥滿桂赴援力戰城東有功增秩受賜崇禎二年擢總兵官鎮守居庸昌平其冬京師戒嚴命提兵五千防順義俄命還鎮防護諸陵四年代宋偉爲山海總兵官積資至左都督七年命偕寧遠總兵官吳襄馳援宣府坐擁兵不進褫職論戍未行會流賊躡河南詔世威充爲事官與副將張外嘉統關門

鐵騎五千往勦明年正月賊陷鳳陽世威以二千五百騎赴之抵亳州會總督洪承疇出關討賊次信陽命世威趨汝州甫三日承疇亦至時賊見河南兵盛悉奔入關中承疇將入關征討乃大會諸將令分防汝雒諸要害以世威部下皆勁旅令與參將徐來朝分駐永寧盧氏山中以扼雒南蘭草川朱陽關之險戒之曰靈陝賊所出入汝勿懈及承疇旣入關賊避之而南復由藍田走盧氏扼於世威仍入商雒山中來朝所部三千人不肯入山大譟賊至來朝逃一軍盡歿世威軍暴露久大疫與賊戰失利世威及遊擊劉肇基羅岱俱負重傷軍

大潰賊遂越盧氏走永寧事聞命解任候勘十年宣大總督盧象昇言世威善撫士卒曉軍機徒以數千客旅久戍荒山疾作失利今當用兵時棄之可惜乃命赴象昇軍自效及象昇戰歿自免歸十五年以廷臣薦命與弟世祿赴京候調召對中左門復告歸明年十月李自成陷西安傳檄榆林招降總兵官王定懼率所部精兵棄城走時巡撫張鳳翼未至城中士馬單弱人心洶洶布政使都任亟集副將惠顯參將劉廷傑等與里居將帥世威及王世欽王世國候世祿侯拱極王學書故延綏總兵李昌齡議城守衆推世威爲主帥無何賊十萬

圍陝延安下綏德復遣使說降廷傑大呼曰長安雖破三邊如故賊皆中州子弟殺其父兄而驅之戰必非所願榆林天下勁兵一戰奪其氣然後約寧夏固原爲三師迭進賊可平也衆然其言乃歃血誓師簡卒乘繕甲仗各出私財佐軍守具未備賊已抵城下廷傑募死士乞師套部師將至賊分兵却之攻城甚力官軍力戰殺賊無算賊益衆來攻起飛樓逼城中矢石交至世威等戰益厲守七晝夜賊乃穴城置大礮轟之城遂破世威等猶督衆巷戰婦人豎子亦發屋瓦擊賊賊屍相枕籍旣而力不支任死之侯世祿父子及學書俱不屈死賊

怒廷傑勾套部磔之至死罵不絕口世威世欽世國昌齡並被執縛至西安自成坐秦王府欲降之四人不屈膝自成曰諸公皆名將助我平天下取封侯可乎衆罵曰汝驛卒敢大言侮我自成笑前解其縛世欽唾曰驛卒母近前汗將軍衣自成怒皆殺之時顯亦被執大罵賊賊惜其勇繫至神木服毒死王世欽大將威子歷山海左部總兵官謝病去崇禎八年洪承疇起之家擊李自成有功卽謝歸十六年召對中左門未及用而歸遂死於賊世國威弟保定總兵官繼子由柳溝總兵官罷歸甫數日竟拒賊以死世威弟世祿爲寧夏總兵官累

著戰功至是與世威同死世威從弟翟文爲靖邊營副將嘗從洪承疇敗闖賊於鳳翔之官亭斬首七百餘級至是率敢死士出南門奮擊殺傷甚衆中矢死又有尤岱者由步卒起家至山海鐵騎營參將數有功忤上官棄職歸守水西門城陷自殺廷傑旣死其父副使彝鼎聞之不哭曰吾有子矣其弟廷夔收兄屍亦自投閣死昌齡字玉川鎮番衛人爲延綏總兵官數有功以剛直罷徙居榆林賊至或勸之去昌齡曰賊至而遁非勇也見難而避非義也起借世威等同守城卒同死侯世祿榆林人由世職累官涼州副總兵遼事亟詔擢

總兵官提兵赴援世祿勇敢精悍爲經畧熊廷弼所知及袁應泰代廷弼亦倚任之天啓元年應泰議復撫順清河以世祿及姜弼梁仲善各將兵一萬駐清河未行遼陽破仲善陣亡世祿弼俱負重傷潰圍出世祿以傷重命立功自效尋用爲固原總兵官六年以軍政拾遺罷明年寧錦告警命率家丁赴關聽調旋命出守前屯甫至令以故官鎮山海崇禎元年移鎮宣府明年冬京師戒嚴率師入衛兵再潰世祿被創部卒剽民間奔還鎮事聞當重坐以勤王先至滅死戍邊九年八月京師被兵率子弟從軍救功免戍還籍廷臣多推薦卒不復

用十六年李自成圍榆林世祿與子拱極固守新添門城陷父子被執俱不屈死拱極歷官參將常從總兵尤世祿破賊河曲有功九年冬任山海總兵官尋謝病歸後以廷臣薦應詔入都與王洪王世欽尤世威召對中左門未用遣歸卒與父同死如人木蘭山轉家西南劉國能延安人始與李自成張獻忠輩同爲盜自號闖塌天崇禎三年大亂陝西已渡河而東寇山西轉掠畿南河北六年冬入河南遂由內鄉浙川犯湖廣鄖襄破數縣明年正月入四川陷夔州折而東入鄖陽境爲總督陳奇瑜所蹙走漢南回困車箱峽已得出復大亂陝

西再入河南躡江北官軍逼之與整齊王屯商維山間
九年復偕闖王蝎子塊等由鄖襄趨興安漢中總督洪
承疇奔命不暇尋南走荆襄與總兵秦翼明數戰其冬
與蝎子塊等十七營窺潼關巡撫孫傳庭扼之引而南
明年闖馬光玉等將犯蘄黃率衆會之直趨江北官軍
數道邀擊乃不敢東還走黃陂入木蘭山轉寇河南敗
參將李春貴兵將迫開封詔諸將發兵援乃南走黃麻
當是時總理熊文燦新至賊憚之見其下招降令頗有
欲歸正者國能先與張獻忠有降慮爲所并後又與左
良玉戰敗乃以十一年正月四日率先就撫於隨州頓

首文燦前曰愚民陷不義且十載賴公湔洗更生願來
衆入軍籍身隸麾下盡死力文燦大喜慰撫之署爲守
備令隸良玉軍國能受約束無異志已而張獻忠羅汝
才亦降皆據邑自固獨國能從軍征勦數有功明年二
月從良玉勤王有詔還討賊獎勵之命兵部授官錄其
部下將士曰獻忠能立功視此遂授國能副總兵四月
良玉會師南陽擊李萬慶國能分擊賊潰奔遂招萬慶
降其秋獻忠汝才並反文燦遣國能率萬慶兵會討遂
並守鄖陽既而李自成據河南復移守葉縣初國能爲
盜時與自成汝才輩結爲兄弟及國能歸正自成輩深

恨之十四年九月圍其城四面力攻國能不能支城遂陷被執賊猶好謂之曰若我故人也何不降國能瞋目罵曰我初與若同爲賊今則王臣也何故降賊遂殺之事聞贈左都督特進榮祿大夫建祠李萬慶延安人崇禎初與張獻忠羅汝才等並反賊中所稱射塌天者是也起陝西蔓山西畿南河北渡河殘河南出沒湖廣四川還趨鄖陽人興安困於車箱峽出險益大肆八年春賊七十二營會榮陽議分兵隨所向令萬慶及許可變助馬進忠橫天王西當陝兵已而諸路之賊盡萃於陝總督洪承疇彌歲不能定益恣出沒於河南湖廣凡十

世宗十二年春國能獻忠降萬慶等大謀而去改稱王三家勢頗衰而文燦擁兵德安不敢擊萬慶等復大振李自成向關中萬慶及馬光玉馬進忠羅汝才惠登相賀一龍蘭養成順天王順義王九家最著八月進忠光玉大挫於潼關九月鄭襄賊又大敗於雙溝汝才率九營走均州萬慶率三營走光固十一月汝才亦降自成又大敗關內勢益衰惟萬慶光玉一龍順天王最勁而萬慶得馬士秀杜應金所劫左良玉賄富且強營麻城徙信陽十二年正月戰敗徙應山德安會光玉進忠等皆大敗進忠懼而降而順天王已死一龍養成伏深

山登相遠掠秦蜀萬慶勢益孤文燦檄良玉擊之唐縣
姚梁分三營肄賊逐入三山裨將王修政趨利戰死文
燦收二營卒令良玉蹙之內鄉萬慶等在赤眉城四平
岡依山結壘請降良玉慮其詐謀之文燦益調諸將陳
永福羅岱金聲桓之兵會於賈宋大勦萬慶及光玉可
變副將國能亦至由張家林七里河分擊賊大奔良玉
遣國能以二千騎往偵且諭萬慶降萬慶馳見輸情國
能遂執許州叛黨于汝虎以降處內鄉城下者四千人
士秀應金見進忠萬慶降而懼復來歸有劉喜才者夜
取順義王首以獻餘黨推可變為主與胡可受皆降白

其盜大衰至五月獻忠復叛汝才率其黨九營應之
復大熾而萬慶進忠以徒衆既散無二心萬慶願從征
自效比國能給餉遂授爲副總兵與國能守鄖陽獻忠
等方大亂蜀中鄖境得無事十四年獻忠突陷襄陽鄖
守如故明年正月總督汪喬年討賊以萬慶從至襄城
軍潰入我賊攻圍之固守五日城陷喬年死萬慶亦不
屈死事聞贈都督同知榮祿大夫立祠襄城

贊曰明至末季流寇蔓延國勢坐困雖有奮成禦敵之
臣而兵孱餉絀徒使賊乘其敝潰陷相屬無救亂亡如
艾萬年等之捐軀盡節其可悲者矣此非其勇不具畧

兵俾領中部調總兵王世欽尤世祿分領南北二部明年正月賜尚方劍實授府銜承宗爲築壇拜大將代行授鉞禮軍馬錢穀盡屬之尋定分地世龍居中駐衛城世欽南海世祿北山並受世龍節制兵各萬五千人世龍感承宗知己頗盡力與承宗定計出守關外諸城四年偕巡撫喻安性及袁崇煥東巡廣寧又與崇煥世欽航海抵蓋套相度形勢而還敘勞加右都督當是時承宗統士馬十餘萬用將校數百人歲費軍儲數百萬諸有求於承宗者率因世龍不得則大恚而世龍貌偉中實怯忌承宗者多擊世龍以撼之承宗抗辯於朝曰人

謂其貪淫賂削臣敢以百口保其必無帝以承宗故不問五年九月世龍誤信降人劉伯溫言遣前鋒副將魯之甲參將李承先率師襲取耀州敗沒言官交章劾奏嚴旨切責令戴罪圖功時魏忠賢方以清君側疑承宗其黨攻世龍者并及承宗承宗不安其位去以兵部尚書高第來代職方主事徐日久者先佐第撓遼事及從第贊畫力攻世龍世龍陰結忠賢反削日久籍其冬世龍亦謝病去崇禎元年王在晉爲尚書世龍上疏極論其罪有詔逮世龍久不至在晉罷始詣獄二年冬都城戒嚴刑部尚書喬允升薦世龍才詔圖功自贖會祖大

壽師潰京師大震承宗再起督師以便宜遣世龍馳諭
大壽聽命及滿桂戰死遂令世龍代爲總理賜尚方劍
盡統諸鎮援師三年三月進左都督時遵化永平遷安
灤州四城失守已三月承宗大壽隔關門與世龍諸軍
聲息斷絕帝急詔四方兵勤王昌平尤世威薊鎮楊肇
基保定曹鳴雷山海宋偉山西王國樑固原楊麒延綏
吳自勉臨洮王承恩寧夏尤世祿甘肅楊嘉謨所將皆
諸邊銳卒內地則山東河南南都湖廣浙江江西福建
四川諸軍亦先後至并壁薊門觀望不進給事中張第
元上言世龍在關數載績效無聞非若衛霍之偉功名

是以服人也諸帥宿將非世龍偏裨欲驅策節制誰能
甘之師老財匱銳氣日消延及夏秋將有不可言者帝
以世龍方規進取不納其言時大壽於五月十日薄灤
州明日世龍等以師會又明日復其城十三日遊擊靳
國臣復遷安明日副將何可綱復永平又二日別將復
遵化閱五月四城始復論功大壽最世祿次之世龍加
太子少保廕本衛世千戶八月復謝病歸六年五月捕
漢虎墩兔合套寇犯寧夏總兵賀虎臣戰歿詔起世龍
代之世龍生長寧夏習其形勢大修戰備明年正月二
部入犯遣參將卜應第大破之斬首二百有奇踰月套

寇犯賀蘭山世龍遣降丁潛入其營馘其長撒兒甲斬級如前未幾插部大舉入寇世龍遣副將婁光先等分五道伏要害而已中道待之夾擊斬首八百有奇巡撫王振奇亦斬三百餘級寇復犯河西玉泉宮世龍復邀斬五百餘其年七月犯棗園堡世龍又大敗之俘斬一千有奇世龍半歲中屢奏大捷威名震西塞無何卒於官年四十餘後論功贈太子太傅世錦衣僉事賜恤如制楊肇基沂州衛人起家世職積官至大同總兵天啓二年妖賊徐鴻儒反山東連陷鄆鉅野鄒滕嶧衆至數萬巡撫趙彥任都司楊國棟廖棟檄所部練民兵增諸

守卒時肇基方家居彥因卽家薦起之爲山東總兵官討賊未至棟及國棟等攻鄒兵潰遊擊張榜戰死彥方視師兗州遇賊肇基至急迎戰而命國棟及棟夾擊大敗之橫河時賊精銳聚鄒滕中道肇基命遊兵綴賊鄒城而以大軍擊賊黃陰紀王城大敗賊蹙而殪之嶧山遂圍鄒國棟等亦先後收復鄆鉅野嶧滕諸縣又大破之於沙河乃築長圍攻鄒圍三月賊食盡其黨出降遂禽鴻儒獻俘磔於市賊平肇基由署都督僉事進右都督歷本衛世千戶尋代沈有容鎮登萊改延綏以擊套寇功進左都督歷錦衣千戶屢加太子太保崇禎

元年移薊鎮西協二年冬大清兵克三屯營肇基乘間收復困守數月卒全孤城
廕錦衣世千戶已錄恢復四城功加太子太師改廕錦
衣僉事明年卒官子御蕃見徐從治傳

賀虎臣保定人天啓初歷天津海防遊擊登萊參將移
兗州六年遷延綏副總兵河套寇大舉入犯從帥楊肇
基協擊大破之加署都督僉事崇禎二年捕誅階州叛
卒周大旺等擢總兵官鎮守寧夏關中賊大起王嘉允
陷清水營殺遊擊李顯宗遂陷府谷其黨李老柴應之
煽聚三千餘人攻合水總督楊鶴檄虎臣往討擊之盤

谷俘馘六百有奇已擊斬慶陽賊渠劉六四年神一元
陷保安延安告急延綏撫鎮皆東援陝西巡撫練國事
檄虎臣及副將李卑接勦虎臣等遂進圍保安賊引河
套數千騎挫虎臣軍會張應昌擊敗之賊衆棄城去虎
臣等前後獲首功一千九百明年可天飛郝臨菴劉道
江李都司再圍合水虎臣偕臨洮曹文詔甘肅楊嘉謨
固原楊麒合擊大破賊甘泉之虎兇四斬首七百有奇
賊大困六年五月插漢虎墩兔合套寇五萬騎自清水
橫城分道入守備姚之夔等不能禦沙井驛副將史開
先臨河堡參將張問政岳家樓守備趙訪皆潰逃寇遂

進薄靈州虎臣急領千騎入守旋盡勒城中兵出擊次
大沙井寇從漢伯堡突至虎臣軍未及布陳且衆寡不
敵遂戰死于讚挾五十騎突重圍出事聞贈虎臣都督
僉事賜祭葬世廕指揮僉事尋錄先後勦寇功再贈都
督同知世廕錦衣副千戶讚勇敢有父風既承廕尋舉
武進士積官至京營副將崇禎十七年三月李自成薄
京師京軍六大營分列城外皆不敢戰或棄甲降讚獨
率部卒迎擊中矢死弟誠身長七尺美鬚髯爲諸生以
忠義自許兄誠襲副千戶早卒無子誠當襲以讓其弟
詮及賊陷保定家人勸易衣遁叱曰吾忠臣子偷生而

逃何以見先將軍地下遂偕妻女投井死

沈有容字士弘宣城人僉事寵之孫也幼走馬擊劍好
兵畧舉萬曆七年武鄉試薊遼總督梁夢龍見而異之
用爲昌平千總復受知總督張佳允調薊鎮東路轄南
兵後營十二年秋朵顏長昂以三千騎犯劉家口有容
夜半率健卒二十九人迎擊身中二矢斬首六級寇退
乃還由是知名遼東巡撫顧養謙召隸麾下俾練火器
十四年從李成梁出塞抵可可母林斬馘多明年再出
亦有功成梁攻北關有容陷陣馬再易再斃卒拔其城
錄功世廕千戶遷都司僉書守浮屠谷從宋應昌援朝

鮮乞歸日本封事壞福建巡撫金學曾欲用奇搗其穴
起有容守浯嶼銅山二十九年倭掠諸寨有容擊敗之
踰月與銅山把總張萬紀敗倭彭山洋倭據東番有容
守石湖謀盡殲之以二十一舟出海遇風存十四舟過
澎湖與倭遇格殺數人縱火沈其六舟斬首十五級奪
還男婦三百七十餘人倭遂去東番海上息肩者十年
捷聞文武將吏悉敘功有容賚白金而已三十二年七
月西洋紅毛番長韋麻郎駕三大艘至澎湖求互市稅
使高案召之也有容白當事自請往諭見麻郎指陳利
害麻郎悟呼案使者索還所賂案金揚帆去改僉書浙

紅都司由浙江遊擊調天津遷溫處參將罷歸四十四
年倭犯福建巡撫黃承元請特設水師起有容統之禽
倭東沙尋招降巨寇袁進李忠散遣其衆泰昌元年遼
事棘始設山東副總兵駐登州以命有容天啓改元遼
藩相繼覆熊廷弼建三方布置之議以陶朗先巡撫登
萊而擢有容都督僉事充總兵官登萊遂爲重鎮八月
毛文龍有鎮江之捷詔有容統水師萬偕天津水師直
抵鎮江策應有容歎曰率一旅之師當方張之敵吾知
其不克濟也無何鎮江果失水師遂不進明年廣寧覆
遼民走避諸島日望登師救援朗先下令敢渡一人者

斬有容爭之立禽數十艘往獲濟者數萬人時金復蓋
三衛俱空無人有欲據守金州者有容言金州孤懸海
外登州皮島俱遠隔大洋聲援不及不可守迨文龍取
金州未幾復失四年有容以年老乞骸骨歸卒贈都督
同知賜祭葬

張可大字觀甫應天人世襲南京羽林左衛千戶舉萬
曆二十九年武會試授建昌守備遷浙江都司僉書分
守瓜洲儀真江洋大盜斂迹稅監魯保死淮撫李三才
令可大錄其貲保家餽重賄却不受葉向高赴召過儀
兒而異之曰此不特良將且良吏也遷劉河遊擊改廣

陳高肇參將調浙江舟山奉命征黎與總兵王鳴鶴用
黑番爲導搗其巢黎乃滅舟山宋昌國城也居海中有
七十二壘爲浙東要害可大條上八議皆碩畫倭犯五
單湖白沙港茶山潭頭連敗之加副總兵城久圯可大
與副使蔡獻臣築之兩月工竣城內外田數千畝海潮
害稼可大築硤蓄淡水遂爲膏腴民稱曰張公硤天啓
元年以都指揮使掌南京錦衣衛六年擢都督僉事僉
書南京右府崇禎元年出爲登萊總兵官會議裁登萊
撫鎮乃命以總兵官視登州副總兵事而巡撫遂罷不
設可大盡心海防親歷巡視圖沿海地形兵力強弱爲

海防圖說上之二年冬白蓮賊餘黨圍萊陽可大擊破之焚其六砦斬偽國公二人圍遂解京師被兵可大入衛守西直廣寧諸門明年以勤王功陞都督同知劉興治反東江遂奉詔還鎮已而四城並復朝議復設登萊巡撫以孫元化爲之元化率關外八千人至強半皆遼人可大慮有變屢言於元化不聽四年七月錄前守城功進右都督十月僉書南京左府兼督池河浦口二軍登人泣留之未行而孔有德反吳橋東陷六城可大急往勦元化檄止之不聽次萊州遇元化復爲所阻乃還鎮歲將晏有德暮薄城可大請擊之元化持撫議不許

可大陳利害甚切元化期明歲元日發兵合擊至期元化兵不發明日合兵戰城東可大兵屢勝元化部卒皆遼人親黨多無鬪志其將張燾先走可大兵亦敗中軍管維城遊擊陳良謨守備盛洛姚士良皆戰死燾兵半降有德遣歸爲內應元化開門納之可大諫不聽夜半賊至城遂陷可大時守水城撫膺大慟解所佩印付旗鼓問道走濟南上之還家辭母令弟可度子鹿徵奉母航海趨天津而以佩劍付部將盡斬諸婢妾遂投繯死事聞贈特進榮祿大夫太子少傅謚莊節賜祭葬予世廕建祠曰旌忠可大好學能詩敦節行有儒將風爲南

京錦衣時歐陽暉由刑部主事謫本衛知事嘗賦詩有
陰霾國事非句楊州知府劉鐸書之扇贈一僧惡鐸者
譖之魏忠賢暉鐸俱被逮可大約束旗尉捐奉助之卜
室處其妻子其尚義類如此弟可仕字文峙以字行隱
居博學嘗輯明布衣詩一百卷

魯欽長清人萬曆中歷山西副總兵天啓元年遷神機
營左副將尋擢署都督僉事充保定總兵官奢崇明安
邦彥並反貴州總兵張彥方在圍中而總理杜文煥稱
病明年十月用欽代文煥命總川貴湖廣漢土軍刻期
解圍未至圍已解欽馳赴貴陽三年正月巡撫王三善

次敗於隆廣羣苗宋萬化何中尉等蠶起欽佐三善防
勦率諸將禽中尉萬化遂進營紅崖紅崖者崇明敗走
處也三善謀大舉深入欽及總兵官馬炯張彥方諸道
監司尹伸岳具仰向日升楊世賞各以兵從五戰斬首
萬八千直抵大方四年正月三善敗歿於內莊欽等以
殘卒還命戴罪辦賊都勻凱里土司者運道咽喉也那
彥結諸蠻困其城長官楊世蔚不能守總督蔡復一遣
欽及總兵官劉超救之拔賊巖頭寨遂移師克平茶已
而邦彥盡驅羅鬼結四十營於斑鳩灣後寨亘二十餘
里分犯普定復一令欽與總兵官黃鉞分道禦之欽率

部將張雲鵬劉志敏鄧玘等大敗賊汪家冲鉞及參政
陸夢龍副使楊世賞亦大敗賊蔣義寨合追至河斬首
千五百餘級搜山復斬六百餘級尹伸守普定亦敗賊
兵與大軍會共剪水外逆苗邦彥勢窘渡河西奔欽鉞
督諸將窮追夢龍等分駐三岔河岸爲後勁前鋒雲鵬
玘等深入織金先後斬首千餘級復一上其功言欽廉
勇雖名總理權力不當一偏裨舊撫臣三善及諸監軍
人人爲大帥內莊失律欽不當獨任大帥罪臣至默以
諸道監軍兵盡屬欽每戰身先士卒欽敗可原勝足錄
當免其戴罪仍以功論從之明年正月欽等渡河還中

伏敗死者數千人充爲事官立功自贖自平越全興
清平二衛苗二百餘寨盤踞其間以長田之天保阿秧
爲魁邦彥初反授二酋都督使通平六衛聲息是年春
寇石阡餘慶監軍按察使來斯行喀阿秧使圖天保阿
秧反以情告斯行乃誘斬阿秧議討天保會以疾去復
一令貴陽同知周鴻圖代爲監軍阿秧弟阿買與天保
請兵邦彥復兄讐復一以兵事屬鴻圖及欽而遣參將
胡從儀楊明楷等佐之欽等三道進大戰米墩山生禽
天保及阿買先後斬賊魁五十四人獲首功二千三百
五十破焚百七十四寨盛夏與師將士冒暑雨衝嵐瘴

劉寇盡除土人謂二百年所未有復一旣奏功未報而
平監軍御史傅宗龍復以爲言乃命欽總理如故鴻圖
授平越知府六年三月邦彥復大舉入寇欽禦之河上
連戰數日殺傷相當夜半賊直逼欽壘將士逃竄欽遂
自刎諸營盡潰賊勢復張欽勇敢善戰爲西南大將之
冠莊烈帝嗣位贈少保左都督世廕指揮僉事賜祭葬
建祠曰旌忠子宗文承廕崇禎中以薊鎮副總兵爲總
督吳阿衡中軍十一年冬牆子嶺失事與阿衡並力戰
死

秦良玉忠州人家石往宣撫使馬千乘萬曆二十七年

千乘以三千人從征播州良玉別統精卒五百裹糧自
隨與副將周國柱扼賊鄧坎明年正月二日賊乘官軍
宴夜襲良玉夫婦首擊敗之追入賊境連破金筑等七
寨已借酉陽諸軍直取桑木關大敗賊衆爲南川路戰
功第一賊平良玉不言功其後千乘爲部民所訟瘐死
雲陽獄良玉代領其職良玉爲人饒膽智善騎射兼通
詞翰儀度嫺雅而馭下嚴峻每行軍發令戎伍肅然所
部號白桿兵爲遠近所憚泰昌時徵其兵援遼良玉遣
兄邦屏弟民屏先以數千人往朝命賜良玉三品服接
邦屏都司僉書民屏守備天啓元年邦屏渡渾河戰死

民屏突圍出良玉自統精卒三千赴之所過秋毫無犯
詔加二品服卽予封誥子祥麟授指揮使良玉陳邦屏
死狀請優恤因言臣自征播以來所建之功不滿讒妬
口貝錦高張忠誠孰表帝優詔報之兵部尚書張鶴鳴
言渾河血戰首功數千寶石砮西陽二土司功邦屏旣
歿良玉卽遣使入都製冬衣一千五百分給殘卒而身
督精兵三千抵榆關上急公家難下復私門仇氣甚壯
宜錄邦屏子進民屏官乃贈邦屏都督僉事錫世廕與
陳策等合祠民屏進都司僉書部議再徵兵二千良玉
與民屏馳還抵家甫一日而奢崇明黨樊龍反重慶齋

金帛結援良玉斬其使卽發兵率民屏及邦屏子翼明
拱明溯流西上度渝城奄至重慶南坪關扼賊歸路伏
兵襲兩河焚其舟分兵守忠州馳檄夔州令急防瞿塘
上下賊出戰卽敗歸良玉止其狀擢民屏參將翼明拱
明守備已而奢崇明圍成都急巡撫朱燮元檄良玉討
時諸土司皆貪賊賂逗遛不進獨良玉鼓行而西收新
都長驅抵成都賊遂解圍去良玉乃還軍攻二郎關民
屏先登已克佛圖關復重慶良玉初舉兵卽以疏聞命
封夫人錫誥命至是復授都督僉事充總兵官命祥麟
爲宣慰使民屏進副總兵翼明拱明進參將良玉益感

奮先後攻克紅崖墩觀音寺青山墩諸大巢蜀賊底定
復以援貴州功數賚金幣三年六月良玉上言臣率翼
明拱明提兵裹糧累奏紅崖墩諸捷乃行間諸將未視
賊面攘臂誇張及乎對壘聞風先遁敗於賊者唯恐人
之勝怯於賊者唯恐人之強如總兵李維新渡河一戰
敗衄歸營反閉門拒臣不容一見以六尺軀鬚眉男子
忌一巾幗婦人靜夜思之亦當愧死帝優詔報之命文
武大吏皆以禮待不得疑忌是年民屏從巡撫王三善
抵陸廣兵敗先遁其冬從戰大方屢捷明年正月退師
賊來襲戰死二子佐明祥明得脫皆重傷良玉請卹贈

都督同知立祠賜祭官二子而是時翼明拱明皆進官
至副總兵崇禎三年永平四城失守良玉與翼明奉詔
勤王出家財濟餉莊烈帝優詔褒美召見平臺賜良玉
綵幣羊酒賦因詩旌其功會四城復乃命良玉歸而翼
明駐近畿明年築大凌河城翼明以萬人護築城成命
撤兵還鎮七年流賊陷河南加翼明總兵官督軍赴討
明年鄧垸死以所部皆蜀人命翼明將之連破賊於青
崖河吳家堰袁家坪扼賊走鄖西路翼明性懼怯部將
連敗不以實聞革都督銜貶二秩辦賊已從盧象昇逐
賊穀城賊走均州翼明敗之青石鋪賊入山自保翼明

攻破之連破賊界山三道河花園溝禽黑煞神飛山虎
賊出沒鄖襄間撫治鄖陽苗胙土遣使招降翼明營其
事爲賊所給卒不降翼明胙土皆被劾已而賊犯襄陽
翼明連戰得利屯兵廟灘以扼漢江之淺而羅汝才劉
國能自深水以渡遂大擾蕪黃間帝以鄖襄屬邑盡殘
罷胙土切責翼明尋亦被劾解官而良玉自京師還不
復援勦專辦蜀賊七年二月賊陷夔州圍太平良玉至
乃走十三年扼羅汝才於巫山汝才犯夔州良玉師至
乃去已邀之馬家寨斬首六百追敗之留馬壩斬其魁
東山虎復合他將大敗之譚家坪北平又破之仙寺嶺
良玉奪汝才大纛禽其渠副塌天賊勢漸衰當是時督
師楊嗣昌盡驅賊入川川撫邵捷春提弱卒二萬守重
慶所倚惟良玉及張令二軍綿州知州陸遜之罷官歸
捷春使按營壘見良玉軍整心異之良玉爲置酒語遜
之曰邵公不知兵吾一婦人受國恩誼應死獨恨與邵
公同死耳遜之問故良玉曰邵公移我自近去所駐重
慶僅三四十里而遣張令守黃泥窪殊失地利賊據歸
巫萬山巔俯瞰吾營鐵騎建瓴下張令必破令破及我
我敗尚能救重慶急乎且督師以蜀爲壑無愚智知之
邵公不以此時爭山奪險令賊無敢卽我而坐以設防

此敗道也遜之深然之已而捷春移營大昌監軍萬元
吉亦進屯巫山與相應援其年十月張獻忠連破官軍
於觀音巖三黃嶺遂從上馬渡過軍良玉偕張令急扼
之竹箇坪挫其鋒會令爲賊所殲良玉趨救不克轉鬪
復敗所部三萬人畧盡乃單騎見捷春請曰事急矣盡
發吾溪峒卒可得二萬我自廩其半半餼之官猶足辦
賊捷春見嗣昌與已左而倉無見糧謝其計不用良玉
乃歎息歸時搖黃十三家賊橫蜀中有秦繼勳者良玉
族人也爲賊耳目被禽殺獄卒遁去良玉捕執以獻無
脫者張獻忠盡陷楚地將復入蜀良玉圖全蜀形勢上

之巡撫陳士奇請益兵守十三隘士奇不能用復上之
巡按劉之勃之勃許之而無兵可發十七年春獻忠遂
長驅犯夔州良玉馳援衆寡不敵潰及全蜀盡陷良玉
慷慨語其衆曰吾兄弟二人皆死王事吾以一孱婦蒙
國恩二十年今不幸至此其敢以餘年事逆賊哉悉召
所部約曰有從賊者族無赦乃分兵守四境賊逼招土
司獨無敢至石砦者後獻忠死良玉竟以壽終翼明既
罷崇禎十六年冬起四川總兵官道梗命不達而拱明
值普名聲之亂與賊鬪死贈卹如制

龍在田石屏州土官舍人也天啓二年雲南賊安效良

張世臣等爲亂在田與阿迷普名聲武定吾必奎等征討數有功得爲土守備新平賊剽石屏安效良攻霑益在田俱破走之巡撫閔洪學上其功擢坐營都司崇禎二年與必奎收復烏撒八年流賊犯鳳陽詔徵雲南土兵在田率所部應詔擊賊湖廣河南頗有功擢副總兵總理盧象昇檄討襄陽賊至則象昇已奉詔勤王命屬熊文燦十年三月擊禽大盜郭三海十一年九月大破賀一龍李萬慶於雙溝進都督同知明年三月大破賊固始斬首三千五百有奇張獻忠之叛也文燦命在田駐紮城邊賊東突諸將多忌在田讒言曰興及文燦被

逮在田亦罷歸還至貴州擊平叛賊安隴壁十五年夏中原盜益熾在田上疏曰臣以石屏世弁因流氛震陵奮激國難捐貲募精卒九千五百戰象四戰馬三千人楚豫破賊賊不敢窺江北陵寢滇兵有力焉五載捷二十有八忌口中阻逼臣病歸自臣罷親藩辱名城屢陷臣妄謂討寇必須曰兵蓋諸將所統多烏合遇寇卽逃乏餉卽謀滇兵萬里長驅家人父子同志非若他軍易潰也且一歲中秋冬氣涼賊得馳騁春夏卽入山避暑養銳而出故其氣益盛夫平原戰旣不勝山蹊又莫敢攬師老財殫蕩平何日滇兵輕走遠跳善搜山臣願整

萬衆力掃秦楚豫皖諸寇不滅不止望速給行糧沿途
接濟臣誓捐軀報國言而不效甘伏斧鑕帝壯之下兵
部議寢不行踰二載乙酉八月吾必奎叛黔國公沐天
波檄在田及寧州土知州祿永命協討擊禽之未幾沙
定洲作亂據雲南府在田不敢擊明年定洲攻在田不
下移攻寧州尋陷嶠峨在田走大理又明年孫可望等
至貴州在田說令攻定洲定洲迄破滅在田歸卒於家
贊曰馬世龍等值邊陲多事奮其勇畧著績戎行或捐
軀力戰身膏原野可謂無忝爪牙之任矣夫摧鋒陷敵
宿將猶難而秦良玉一土舍婦人提兵裹糧崎嶇轉鬪
其急公赴義有足多者彼仗鉞臨戎縮朒觀望者視此
能無媿乎

